

陵川縣志

庫增銀題

陵川縣志卷八

古蹟考

殘山賸水廢址荒邱關係地方歷史者甚鉅不惟得失成敗足資觀感而好善惡惡之心基於此者亦不淺如近代之鑄銅像造浮圖建豐碑皆欲使人追踪芳烈之意也志古蹟

箕山履跡邑東二十里箕山石上有巨人履跡相傳箕子因商淪亡避地於此及武王訪道易履而行今其遺跡云

馬武京砦邑東九十里馬武山傳漢馬武屯兵於此遺址尙存山之棘無倒刺蛙不鳴謂光武衣被牽破故去之厭煩聒故禁之錦屏山宋都君錫隱居於此山多芍藥邑令呂由庚牽率名流結

芍藥會

蓋城古蓋城縣治今廢在縣西南五十里

趙狀元帥臺在楊寨村相傳趙狀元安時爲南京路都總管時屯兵於此

御書樓太原郡侯武明甫奉御書處

棣華堂邑中城南郝文忠經曾大父兄弟七人同居友愛植棠于庭

金郝處士天挺墓碑城北三里楊大坂門人元好問撰文

金劉景元碑元郝經有讀鄉先生劉景元碑詩太行元氣果不死
弊世有此魁傑士胸中羅列世間書泛異窮奇無不至又云九

臯清唳誰不聞海內至今揚清芬鄉閭晚生不及見掩淚空讀
遺山文

蘇墳別業金詩人秦齋所居元好問送以詩天隨杞菊年年新石
田茅屋連蘇墳

貞白書院古賢寺側明袁邑令建

落鴈池在城南元郝文忠公故第側擬汴之金明池公有帛書繫
鴈足事比還之歲弋者獲於金明池上後乃因公門人郭貫上
之帛詩留東觀公時爲元國信使使宋賈似道當國冒功留館
者十六年其詩云霜落天高恣所如歸期回首是春初上林天
子援弓繳窮海纍臣有帛書邑人于公故第東一池名曰落鴈

池孫令盤立亭於池上刻鴈足詩以表之其在儀真館一詩云
持節江頭久食魚館人供鴈意踟躕呼兒細看雲間足恐有中
原問訊書

仕林莊邑東二里先後士大夫多居此

仙人橋在縣東南六十里相傳有仙人指引鑿絕壁開陡迤而大
路始通橋南石上有仙人履跡康熙甲申以虎傷人建元壇廟
鎮之後橋壞民國十九年知事王錫禹重修榜曰行巔第一橋
有碑記

黃圍山絕頂祖師殿後有塚相傳爲五祖聖母塚今築以石巖然
可望後有玉帝廟再後有五祖廟

天橋在黃圍洞南里許天生石橋下有穴深數丈上則寬闊宏敞朝頂者必由是而上

鳳凰窰在縣治東南距城五十里許鳳山上土人相傳有石仙趕鳳凰入窰仙立守之至今窰內有鳳翅痕窰口有石仙形自窰而東山腰峙一石門門首有鳳仙詣途四字由門而上爲鳳凰臺東望展誥西顧盃纓二山相映窰岩下有玉皇觀二仙祠及三教堂樹木蔭翳左右環列洵勝地也

白陁在陵川與輝縣接界按郭緣生遠征記云太行首始河內自河內至幽州凡八陁爾雅山中絕曰陁第一軹關陁第二太行陁第三白陁此三陁在河內第四滄口陁在鄴西第五井陁

第六飛狐陁第七蒲陰陁此三陁在中山第八軍都陁在幽州義井縣西二十里義井村地少水一井味獨甘里人以次汲

孤石城東南一百一十里乾河道中有孤石大畝許不與四山連傑然獨秀於黃塵坦蕩間其狀偃蹇如蹲其形五色如煉天下奇觀也環石居者名孤石村

石佛碑在縣東二十五里神山頭碑鐫定和弟子孟光等字蹟糝糊係隋開皇二年刊立

佛山石佛邑東北四十里昔有牧羊子在山中枕石佛眠夢與語曰將余負至山巔與余立廟可以護佑一方因而立寺石佛座下有古洞時有雲出

雙龍洞在邑東六十里洞廣二間中有天生龍形盤繞石上久而
不磨同治間有病瘋者入洞將龍鱗削去數年後龍形復生鱗
爪悉具其神異如此

劉秀城邑東百十里王莽臺之東南山上有古城遺蹟城邊有旗
杆石城北有梯名北坡梯俗云劉秀受王莽之逼從此梯而逃
陵墓

晉石勒塚在縣西北一里崇安寺門左晉記載咸和七年石勒死
夜瘞山谷莫知其所備文物虛瘞號高平陵史稱勒附劉淵後
將曩代帝王及先賢陵墓靡不發掘勒瘞其母王亦爲虛塚蓋
勒暴轢中土自知稔惡懼後人發掘其葬陵川或以其地僻而

易匿也傳勒塚在佛座下其門左者尙屬疑塚云又榆社縣亦

有石勒塚

唐宋侍郎墓失名縣西南三十里

宋都轉運使貺墓縣南二十里義門村有碑記及石羊虎

金趙義士振墓縣東二里仕林庄

劉景元昂霄墓縣東南二里楸樹窰元遺山有志銘

郝處士天挺墓縣北三里詳註古蹟郝處士碑下

少傅墓失姓名縣南五里

趙狀元安時墓縣東仕林庄

武氏三狀元墓在蘇村方二十畝詳載地理一統志全書

侍郎武俊臣墓在仕林庄三角原

元李朝列順墓縣東南二里楸樹窠有翁仲石羊虎

牛侍郎潛墓縣西北三十里池下村

蘇尙書萬初墓縣東窠庄東郭外有神道碑

李尙書廷實祖墓在楸樹窠

李昭容墓在楸樹窠唐福王綰後殿直宜兒元貞元年選入昭

容閣

路尙書元墓在附城鎮

戶部員外贈太常少卿申良墓在翠微山李士元作志銘

明張御史凝墓在少傅川

武烈女繼姑墓在縣東十五里莊兒村

張卿伯瓚墓縣北八里魏家庄

李主事衡墓在縣東五里府志作李鐘

武江寧令錡墓在縣東五里雲谷圖

武金壇令思明墓在縣東二里

清曹僉憲墓在池下村

李烈女大姐墓與聘夫郝二髦同穴在魯山村

進士趙一心墓在嶺細村

南豐令秦克俊墓在罐泉村

薛御史鳴皋墓在三泉村南庄

中華民國劉委員墨樵殉難碑在縣政府

附義塚

同治八年邑令楊光海置買義塚地兩處掩埋無主尸棺

附載

一覽亭在濟瀆廟右

龍王山塔王令宏遠建

古郊村孫令必振改爲重興鎮

硯池在學宮東南隅邑令陳封舜念科甲寥寥鑿池於奎樓之

南故名今俗名爲官泊池

慶有亭邑令施敬勝建

大觀亭邑令平鄙鼎建

東澗亭陳令封舜建

南嶺五魁樓文峯塔陳令封舜建

龍門塔陳令封舜建

喜雨亭邑西南五里許鳳山麓龍王祠右有湧泉一泓絕清冽
四時不涸匯于前爲曲水有亭翼其上址臨沙磧每修輒圯
乾隆壬辰知縣程德炯相地勢移建於左麓時適禱雨有應
遂仿蘇公意匾曰喜雨亭而爲之記

宦蹟錄

一命之士苟存心於利物於人必有所濟縣令爲親民長官

乃國家最要官職政平訟理純係於此存心利物則民之被其澤者大矣可不勉哉志宦蹟

唐崔琛咸通間縣令勤懇愛民期月而治頌德者比之甘棠當日

有禮義村嘉禾瑞應事祀名宦

府志作崔燦誤

宋董沔元豐間縣令有學識時王安石新法巖切沔陰以寬濟民又抗疏請毀淫祠及罷一切不及之務祀名宦

呂由庚元豐間縣令以瀛州防禦推官知縣事教養兼行士民戶頌提刑學士黃公廉贈以詩祀名宦

金魏致隆

府志名繼隆誤

天會中令首重學校與主簿趙大允計遷聖廟於城內率諸生詣學講習彝倫風俗翕然不變焉祀名宦

田居敬貞元中進士爲令甚嚴政刑無苛無濫吏畏民懷士尤賴其陶鑄甫下車立學校聚諸生親教之是時上春官中選者有張鎔明年秋禾根隔五壠同穎民以爲善政所感同年邑人趙安時記其事祀名宦

元泰太原秀容人泰和中任仕學俱優以陵川風土完厚人質直尙義爲子求師此州爲宜乃就調陵川縣令挈從子好問往就學於晉卿郝先生德器大成爲時名賢

元張黼銅鞮人至正間由高平教諭遷陵川尹時破頭潘關先生自鄴攻潼關兵臨城扞衛力盡不屈而死祀名宦

申大中大德中任綽有政聲

明王憲鄞縣人宣德初知縣性體安和政刑寬大凡鞠獄察其詞
屈薄懲之復委曲導化以寡民過民皆感激爲良善在任數載
幾致措刑去官時老幼送之相望於道

任通易州舉人景泰間縣尹勤於爲政視官事如家事百廢以次
修舉民被惠累世不忘時稱古之遺愛焉

李濟定州舉人成化年任有詩聲

任玉鄆州人成化間縣丞廉明正直嘗自言曰不敢求安以病民
其矢志如此卒於官民痛惜之

孫磐遼東進士宏治丁巳來尹是邑爲政務在抑豪強恤孤弱使
貧富大小各得其所先是坊廂人役下鄉拘攝小民不勝其害

乃出令嚴禁之民不爲擾各里桑園久淹沒躬督民勤力布種利始不棄於地又設法措置雜糧十萬石以賑凶荒所全活者甚多至於弭盜賊均徭役息訟獄諸善政不一而足尤勤於造士率諸生朝夕課之鄉舉二人皆名雋鄉立社學童子就業者三千餘自集養正編並小學四書養蒙大訓使之誦習歷二載以憂去士民遮道泣送爲立去思碑載其實政祀名宦

楊璽禹城舉人宏治中任誠心撫字不事催科民無追呼之擾有興作不輕用民力凡可得已者悉免其役時有慈母之頌

袁淮任邱人進士嘉靖間縣尹甫蒞任勸闢田教勤畊示之本申祖訓示之恭去貪放猾示之法祀賢廣教示之禮緩征禁索示

之靜閱十年民獷變而良俗鄙變而雅善政入人深也立貞白書院祭酒崔銜爲作遺愛記以誌民之不忘祀名宦

李麒涇州舉人嘉靖間任不尙峻厲亦不爲姑息性明決勇於任事初邑城舊覆以土漸就傾頽乃鳩工費以磚石城始完固又嘗勸農桑俾知務本無游惰苟安者值歲歉散穀賑饑民無菜色時稱爲良牧

劉廷儀慈谿人進士嘉靖中任強毅公正不阿上官以廉儉約己興學校陶鑄人才彬彬有造有德邑多盜出幹役擒捕之無漏網四境帖然尋擢御史

趙孟乾選貢禮縣人嘉靖中任修廢舉墜勤於整飭舊邑志其纂

輯也陞太原府通判

孫紹先萊陽貢生嘉靖中任下車即詢民疾苦邑中一切咸取辦里甲有歲例有常供有公筵直日諸浮冗紹先釐爲六事聞於上官悉裁之且鐫石垂永久邑在金元時賢豪輩出因念廟學爲育才重地遂用縉紳士議遷東城外舊址自是人文日盛頑民負官租歲以爲常乃示催徵之限不候箠鞭民爭相輸納不逾月而立報竣民素苦徭重一役出中人之產破紹先悉知戶口單弱力爲調停凡驛傳庫斗諸役各准丁賦劑量爲式而小民始安他若墾荒蕪以贍困煢招流移以復本業敦行鄉約練習民兵諸所浹洽民心者甚深歷二載歸去民攀轅不忍舍爲

建生詞立德政碑祀名宦

馬世忠監生寧晉人嘉靖中縣丞增修磚城

馬宗孝貢生萬全都司人隆慶初令尹爲政嚴明禁礦盜抑市豪以私干者即寘於法奸吏不爲蠹治民則濟以寬植桑數多者賞布絹墾田乏力者給耕牛丈地均糧建宮修學士民德之擢少府

劉汝江貢生贊皇人萬歷中縣令御衆以寬惻恒施惠初稅糧常逋欠民苦追呼汝江特定輸納之限令自完辦民果如期而至舊城多圯壞池壅塞率民修治完固又均徭役僉驛傳常捐俸以濟貧不能葬者祈雨皆應太常卿高平郭東作劉馬去思碑

記

李士登進士洛陽人萬歷間任少年勵清操精吏治老練者不能過尤加意作人指授文法士多向風官至方伯

許自嚴選貢井陘人萬歷時任政清刑簡專尙教化和平寬厚不虐民以取媚其修邑乘語曰一官之去率不過五稔邑志之修當於此時以官之始去撫拾最眞而官之旣去其評隲又易公則其爲政可知陞臨洮府通判民歌思不衰

馬如龍安塞人選貢萬歷間任置木皂數十凡訟者受攝牘懷一皂往當攝者莫不悚然就訊無胥吏之擾徵輸立限以次俾民易於上納徭役各分煩簡俾民易於力任縣堂明列科條搜剔

弊蠹役屬凜若神明偷竊斂跡幾於夜戶不閉訟獄立剖案無
留牘他若課農養老招流亡備荒歉次第畢舉且留心學校政
有餘閒輒飭學規新禮器以經義策諸生期月忽以憂去服闋
補順德縣復調郡倅邑人思而不忘太常卿郭東紀其事於石
張堯輔宜川舉人萬歷間來任毅然有志操通達庶事緩催科均
徭役撫民以治行稱陞灤州知州

雍獻策睢州舉人萬歷中任存心純厚蒞政廉平左遷去邦人惜
之

司之翰林縣舉人萬歷中任長於詞賦
王治舉人平涼人萬歷中任愛民造士

張汝濟通州舉人萬歷中任清操自勵率真而行

張自蘊舉人即墨人萬歷中任惠民抑強興起斯文調介休縣

鄭悅民貢生陝西人天啓中任風度端凝首嚴士習

楊驥徵選貢安塞人崇正間任時徇賊肆虐王觀察肇生提兵親

勦驥徵內籌軍儲外佐擘畫卒能殲賊爲政獨持大體並優詞

賦政間務簡不廢歌謳著有清霞閣草

劉本郴州人天啓中縣丞一介不取克儉官常

謝志安恩生江南人崇正間以州同署陵川縣事流寇猖獗山城

危如累卵志安激忠義以勵人心設奇禦敵有再造功

蕭獻瑞舉人湖廣五開衛人崇正間任宏襟雅量重士興文

朱奉鑣貢生四川人崇正間任貴德重農

王肇生山東掖縣貢生崇正初任潞安兵備分巡冀南道時陵川西南界水峪村有獬賊久竊據聚黨數千人劫掠鄉村淫殺狼藉陡占山險莫可誰何肇生履任即欲勦除而各屬依違諱匿未敢發乃毅然躬歷所部先遣中軍陳承業指揮張承寵率兵保守陵川縣城自統衛卒鄉壯與河南副使祝萬齡合兵搗其穴入馬武京寨殺賊首二百級生擒者三百餘六戰焚其巢所得資財均給士卒未幾流賊勢合河北蜂擁蝗集肇生督戰與賊爭險賊因窮谷而上遂爲流矢所中陣亡

據平副鼎祠記

陳承業張

承寵皆死之邑人王鼎新等爲之塑像立祠祀名宦

董時增千總初隨肇生與賊戰賊逼肇生幾不免時增以身捍之
手刃數賊死

斬朝鮮千總賊竊發時朝鮮先與之戰死之

陳承業張承寵與董時增斬朝鮮俱武弁也董以身捍將主斬以
殺賊先登陳張力戰死於行陣臨難不避可以勵節因附紀王
兵備後

是時縣令楊驥徵籌軍供餉長子丞章聯松守城運糈贊丞王國
柱多所擒獲捕尉王維敬斬捕獨衆

守城者北門則學博高可久南門則千總李植東門則貢生婁銘
流賊走陵川督兵則晉撫宋統殷宣大統制張宗衡統殷軍至陵

川扼其北歸賊死鬪互相勝負宗衡兵駐高平統殷肇生畢會
破賊於桑子鎮

清劉玘貢生臨朐人潔己愛民不狗上官尤善於摘伏

李向禹遼東鐵嶺人順治五年以貢生來知縣事己丑姜瓖之變
兵逼城下妻王氏曰君職守土無以家爲念向禹率家人馳出
王氏用白練自縊二女暨婢從殉城陷向禹被執誘之降復怵
以兵卒以不屈死越八年後任黃國瓌始上其事贈山西按察
司僉事廕一子入監

黃國瓌山東鄆城人選貢順治十二年冬履任是年久旱大饑斗
米錢千五百民大困邑人徐交泰記謂陵邑數年中師旅交警

饑饉頻仍百姓散失國琛招流亡勸開墾民無力治田及貧不自給者量給資糧助之少甦爲之修聖廟設義學置義田百畝於湯庄刻誠訓諸書導民於善禁役吏不得下鄉折獄明允不徇情枉法積弊悉除稱良吏之最歷年來陵之凋瘵爲之頓蘇越明年嘉禾生次年雙穗滿野民咸以爲善政所感上聞獎異之陞陝州知州

孫必振山東諸城人進士以懷慶推官裁補陵川縣邑中金元時廷試第一者凡六人後四十年不見科目必振至首以建學廟爲計繼而創書院督課諸生於是得連舉於鄉舊例解黃絲黃絹必振祛除其累省賦歸民民情稍舒除豪猾蠹役訟庭間闕

民咸樂生又續修縣志任六載遷御史去民遮道數百里既去立祠祀名宦

王宏遠山陰監生康熙三十年任矢志潔清重農桑崇學校聽訟則諄諄勸誨直如家人父子然不復立威嚴以畏民行鄉飲酒禮建文峯塔二時人勒碑曰王公卓筆峯邑人士至今頌之陞北直滄州知州

平鄣鼎山陰副貢生康熙四十年任其治陵川最久勤於修舉惠愛及民民往往有陰受其福而不知者時方議徭役征稅貢賦等他縣悉照議輸納陵川獨不及鄣鼎蓋密籌顛請得免亦并不言其獨免之故以布德於民迄今士人知之者猶誦爲眞長

者也當康熙三十五年間前令去任時將所欠田糧改注倉穀

歷年既久里長受累甚重平公代捐六百餘石民困得紓

曹茂先江西新建人拔貢雍正三年由試用鳳臺來署陵川蒞事

明達以興復為己任不因署篆稍諉方詳請修學文未轉而將

代獨先捐修崇聖祠一所并倡捐數百金貯之以待取給焉因係

署任未
列官師

胡拱樞縣丞浙江山陰人康熙元年任屢署縣事慈惠寬平邑人

相率公籲崇祀名宦

雷正實心為民毫無科歛祿養不繼嘗捐家資數千且重開水口

纂修縣志書邑人德之

吳之璘廉謹鎮靜約己便民

陳封舜甫下車教養兼施見邑中文風不振創立書院延師訓誨
身親督課朝夕不倦又補文峯數處嗣後人文蔚起科第連茹
且勤於勸農俾百姓有賣劍買犢之慶蒞任九年時和年豐邑
人祠祀之

施敬勝居心廉靜馭下和平承地方疲敝之後民賴以寧奉令辦
公餘資數千毫無所染悉增修

聖廟自孫公之後百餘年來有功德於陵邑者惟公爲最士民祠
祀之

王篤祐乾隆年間任修廢舉墜有利必興爲郝文忠公創置祠田

陝川縣志
卷八
令其裔孫承祀復捐金生息以爲教養之資移城外書院於城中署東增修講堂內外齋舍數十間俾肄業得所又於南城外置在官夫田若干畝人沾實惠去任後邑人建碑祀之

程德炯乾隆年間任勤於政治興復普育二堂以濟老幼之貧者重修邑志躬歷山川圖繪關隘芟繁增簡斟酌盡善在任八年去

熊中砥乾隆年間任勤課耕桑創修祠宇際月課書院聞一才士卒痛哭而歸其仁厚可知

門祥麟嘉慶年間任淡泊自守不阿上官卓著廉聲每日輒作束裝狀嘗曰吾十八年校官至此不畏謫也

羅璿嘉慶年間任恩信素著時值豫匪近邊上憲駐軍協防公率紳親守隘口遏賊西竄之路以積勞卒士民惜之

強上林道光初年以庶常蒞任治多善政修城垣補水口勤課書院俾肄業諸生五日一晤親督課程見邑距省途遠資斧維艱創捐鄉會費三千金以資寶興自是科第不絕爭頌其德以憂去任工大小楷遺蹟甚多邑人於文昌宮後院建碑祀之

謝照道光年間任居官清儉課士得人精於文衡時人服其賞鑒劉承寬道光年間任剛毅有爲斥唆訟勦窩賭豪猾斂迹嚴禁婦女遊觀勸行蠶織捐復社義倉二千餘金賑荒濟貧獎勵士子多所成就政聲藉甚

陳泰華咸豐年間任循謹愛民終於官有詩名

朱光綬光緒年間任實心愛民刑杖不施有蒲鞭之風創捐武鄉試公費因時嘉惠期年調任萬泉

徐林陝西朝邑拔貢宏才大略有守有爲光緒己卯年履任時正值大祲之後所有善後事宜朝夕籌畫倍至憂勤凋敝餘生賴以安撫舉凡災地情形民間疾苦一一痛切稟陳上憲屢邀批示嘉允且爲邑請免無着老荒地糧永除民累尤功德之最著者在任九月調長治縣去

華鳳章字藻銜清進士清廉耿介民深愛戴聽斷公允獄訟爲稀翁葆昌字禮卿清正廉明熱心學務

章之傑字仲選浙江山陰人舉人由大挑揀選知縣清光宣間任
捐置聖廟祭器多種在陵未久而官聲卓著爲人光明磊落憂
國愛民歷任陽曲永濟等縣入民國遂絕意仕進僑寓北平有
古隱士之風

計登瀛字琴生清進士學問優長寬厚愛民

以上清

馮仰璧字宗獻崞縣人勤政愛民官聲卓著改修河渠挑治街道
地方甚蒙其惠

王錫禹字九疇本省朔縣人法政畢業保薦縣長在陵五年有餘
民甚愛戴邊縣多事斡旋之力爲最多至大軍過境及丁匪入
城通權達變應付有方地方大受其福旋辭職二十年署聞喜

現署沁縣

以上
民國

明教諭路泰曲阜人洪武間有功於修學

劉商梅德州人有師範

韓廷聘洪洞人師資可法

馬授義正定人課士得人

孟學周遼州人儀度端肅

霍朝重馬邑人文足範世

李守正平定州人嫻於詩詞

陳正渾源州人有詩名

劉思孟武原人課士有方

陳復寧鄉人博學鴻才

張養奎安肅人剛正不阿金玉其品

柳有聲洪洞人溫厚謙和

高可久壽陽人工大篆能詩獬作亂守北城

王繼魁大同人敦誠謹厚有古人風

清教諭陳宏周陽曲人藹然可親多士式化

明訓導關釗寶鷄舉人成化間任樂於啟迪

朱幹監生南宮人成化中任端重謹恪德量化人

郭聰磁州舉人宏治中任造就多方

崔肇先耀州人端謹足法

陝川縣志 卷八
韓與立交城人藹然相接如坐春風

清訓導弋熏安邑人運司歲貢康熙中任在任增修學署歷官詹事府掌印主簿

張倬歲貢臨汾人雍正二年調補主簿品端才優教士有法

黃同勳典史山陰人工書儉以養廉不滋詞訟爲少尉清廉之最
史長貴典史精明強幹遇事有爲光緒三年教匪竄入奪火鎮率
勇退寇民感其德

陵川縣志卷九上

士女錄

陵川人才自元中葉以來頗見衰歇惟氣運盛衰亦有定數
鬱之久則宣之也大太行豪傑所自出國難方殷環境壓迫
或將挺出一救世偉人一爲吾人增光輝而繼文忠之芳烈
亦未可料是在青年之奮鬪耳昔管子謂禮義廉恥國之四
維四維不張國乃滅亡貞節婦女志堅金石操潔冰霜於禮
義廉恥四字洵屬完全無虧矣可不敬與惟清光緒八年辛
宣統末年二十餘年祇田星橋妻段氏牛喜拴妻趙氏王岳
妻趙氏三人然二趙事蹟均不傳民國以來則無矣志士女

後漢陳龜字叔珍上黨泫氏人家世邊將便習弓馬雄於北州龜少有志氣永建中舉孝廉五遷五原太守永和中拜使匈奴中郎將時左部亂龜以單于不能制下促令自殺坐徵下獄免再遷京兆尹三輔豪強多侵枉小民龜到厲威嚴悉平理其怨屈者郡內大悅會羌胡寇邊桓帝以龜世知邊俗拜度遼將軍臨行上疎斥姦殘簡將校寬和赦罪帝悟自刺史太守都尉以下多所更易下詔爲陳將軍除并涼一年租賦龜既到職州郡震懾鮮卑不敢近塞省息經用歲以億計大將軍梁冀素有隙讟其沮毀國威挑取功譽坐徵還遂乞歸田里復徵爲尙書冀暴虐日甚上疎言其罪狀請誅之帝不省自知必爲冀所害不食

七日而死西域羌戎并涼民庶咸爲舉哀弔祭其墓

後漢書本傳

按陳龜籍泣氏漢陵川即泣氏地故并收載

北周郭誕任并州刺史細侯後也闡化以禮士夫仰其高風訓俗以仁百姓歌其盛德煢獨荷澤豪彊畏威

按舊志謂明嘉靖年孟志誕魏時人康熙年縣志誕宋人省志誕東晉人郡志誕北周人蓋不可考矣相傳闡化等六語爲基銘所載未知確否然爲郭細侯後又同爲并州刺史或去漢不遠似以魏人爲是特無確據姑闕疑焉

唐郭樸制行孝弟稱文學儒者刺史屢薦不起清泉白石以此自終

武少儀自幼聰明過人日記數千言比長善詞賦惜多散逸舉明經不樂仕進往來蘇村山水間

宋張廷翰初爲五代後漢祖親校漢祖入汴補內殿直遷東西班軍使周世宗時改護聖指揮使從世宗平淮甸以功遷鐵騎右第二軍都虞侯顯德未改殿前散都頭都虞侯入宋權鐵騎右第二軍都校領開州刺史從平揚州又以功遷控左鶴廂都指揮使領果州團練使乾德中伐蜀以廷翰爲陽州路行營馬軍都指揮使隨劉廷讓由歸州路進討師次夔州廷讓頓兵白帝廟西俄而夔州監軍武守謙率所部來拒戰廷翰引兵逆擊敗之於豬頭舖乘勝拔其城蜀平授侍衛馬步軍都虞侯領彰國

節度使開寶二年疾太祖親臨問卒年五十二贈侍中宋史本傳

都貺字君錫以明經登進士第哲宗時官至朝請大夫鴻臚寺少卿每朝帝虛已諮訪貺據經正對多見嘉納拜梓州轉運使提押西川四十五州美績多著遷居錦屏山中為芍藥會與一時名人谷漢臣高子美輩往來山中詠歌自得後屢薦不起墓在義門石羊虎猶存從祀鄉賢兄嚮進士別詳技術傳

按舊志兩載都貺一入節行一入隱逸竟似兩人矣略辨數語不詳不悉蓋不知其仕在前而隱在後也至云隱邑南之錦屏山縣令呂由庚聞之屢薦不出查呂由庚為宋元豐中邑令都貺名在元祐黨籍中前秦觀黃庭堅後程頤鄭俠以

陽川縣志 卷九
時代考之則其爲一人可知也但舊志聞之二字下筆欠斟酌遂滋疑耳今從朱太守澤州府新志作一人又府舊志隱逸作都君錫謂邑令呂熙道屢徵之不起查縣志宋邑令無此姓名自當以新志爲是

李大節唐韓王元嘉後志尙高潔爲當世所推工春秋毛詩尤精天官地輿之奧裔孫順封陵川男注籍陵川

李異受學於大愚公著有切韻門庭傳於二子長林次森同舉進士孫曼晏曾孫仲立仲略皆舉進士累葉以文章華國代多聞人

按李異李森等府志俱載高平而本縣志並收之且謂前籍

陵川後遷高平蓋李大節李順皆籍陵川至李異後則遷高平耳名家繼躅木本水源從寬備載尙不至貽譏於郢書燕說也

都嘉猷貺從子以明經舉進士初任信德令有惠政民愛如父母轉南京路兵馬都總管鈐制多偉績進天水開國子食邑五百戶賜紫金魚袋從祀鄉賢

崔有孚七狀元之一從祀鄉賢失傳

按舊志謂宋史選舉志無其人疑其爲武科或金元時人細閱宋史選舉志所載科名皆困條例有變而後載金元亦然非歷科備載如明史某科某人榜也則有無不足猷疑且邑

志有其登第詩非武科明矣

李森字彥實異次子年十八澤發解第一授萊州文學贈正議大夫天會間大飢斗米千錢流莩載路森出粟千斛賑之活者甚衆或曰易此可得數千緡森笑曰活人數不愈於得錢數千緡乎途遇行旅二人病仆垂斃掖至家醫治全愈皆感泣而去靖康之亂盜賊掠境森謂渠長日爾等止可取財但勿殺人賊皆羅拜而散其以德量感人類如此

武白授上京國子博士改臨潢縣令遷廣德軍節度副使先是有訟宰相劉慎行與子婦姚氏私者有司出其罪聖宗詔白鞠之白正其事使新羅還權中京留守時慎行諸子皆處權要以白

斷百姓分籍事不直坐左遷未幾遷尙書左承知樞密事拜遼

興軍節度使致仕卒

遼史本傳

金劉昂霄父俞明昌中進士昂霄氣涵萬有於書無所不窺凡六經子吏官制世譜靡不詳貫於兵家成敗尤歷歷如指諸掌少時讀廣記半月能背誦元好間嘗指試之一過目無遺脫每人座譚詞如雲脾腕一世聽者噤不得語評者謂王湯臣論人物李之純元談獨步昂霄則兼衆人之所獨愈叩而愈無窮明宋濂哀志士詞序列其五人劉昂霄其一也用門資叙調慶陽軍庫使不就臨終夢賦山泉詩云帶雲縈遠澗和月到疎林又云萬里馮唐老中年賈傅歸方薦宏詞未幾卒年三十七崇祀鄉

賢

趙振孝義好施父沒哀感路人析產推肥於其兄自取瘠者里中
有貧不能婚塋悉力周賻又常注藥救病賑粟救飢賴以全活
者甚衆至天眷貞元間二子安時安榮皆廷試第一崇祀鄉賢
郡志作趙鎮

武明甫字無疑號太復加封光祿大夫太子太保戶部尙書太原
郡侯賜諡文端生於金天會九年秉姿英異讀書一目數行行
年二十四登正元二年詞賦科狀元及第初授翰林應奉文字
尋遷秘書省校書郎轉著作郎大理正正隆三年轉儀曹郎掌
書命四年拜諫議大夫右正言在職鯁正敢言海陵濞虐遷都

於汴不迎其母公上章切諫留中不報後欲舉兵南下公犯顏
極諫謂我國家雖云兵強但新都於汴宜安輯人民固根本不
聽謂阻撓軍機禍幾不測宰相李通申救方革職及世宗立於
北京而海陵遇殺江南中外咸尊世宗爲皇帝查舊曾諫海陵
者得公章曰使海陵聽此言何至失國遂詔起復以覃恩特晉
公徵仕郎勅公從宰執完顏思敬修太祖太宗熙宗海陵實錄
成直史館遷翰林修撰六年加侍講學士八年出爲安國軍節
度副使時安國飢災公正整紛剔蠹恩煦信孚勸農桑興教化
期月而民獲蘇詔還復爲翰林侍講學士上問古今儒士優劣
古對稱旨又嘗諮治道公曰恩賞明則賢人君子勸刑罰當則

奸宄小人消言君能如此則天下不勞而治公蓋因時啓沃也
十一年遷兵部侍郎尋改戶部侍郎十三年又出爲應州彰國
軍節度使時南比和好國家無事公上章於朝謂天下雖安然
忘戰必危上優詔答之十九年遷西京路兵馬都總管兼留守
司副使尋又遷戶部尙書二十五年以年老乞致仕章數上世
宗溫旨留後見其詞懇切准令致仕賜黃金百兩白絹百疋蓋
以公廉介故優崇之及旋里築室於縣東北高阜處扁曰樂天
園飲酒賦詩酒然無累卒於大安三年三月初二日壽八十一
賜諡文端崇祀鄉賢子天中廕授太常寺簡閱孫二桂槐廕授
樞密院檢校

武俊臣字秉鈞明甫弟才高學富登正隆進士與文端公兄弟聯芳初授著作郎世宗即位以公爲章武軍節度使掌書記以精密謹慎稱陞戶部度支司員外會計精核以能幹擢樞密都承旨權中京留守遷大理司少卿丁父憂服闋起復爲大理司少卿公明法而恕冤獄全活者甚衆丁母憂服闋起爲西京副留守時承平雖久人尙不知學公上章極言宜立學校以儲人才厚風俗上於是令天下府州縣設學養士公在西京政寬刑簡民咸安之以考績稱最命公爲三司副使與宰相張不合出爲永定軍節度使上廉知其賢名爲禮部侍郎上春秋漸高而公以髦年上喜其老誠眷注甚篤大定二十七年章屢上乞方許

致仕照例賜公銀帛夫役公歸家與兄文端及趙全老昆季並
在縣諸公優游樂天園飲酒賦詩以盡餘年知足不辱知止不
殆其公之謂乎子天授廕授供奉班歷監司管勾改耀州防禦
使兼理白河三渠規措使姪天常廕授大常寺檢討以能幹陞
國史院編修

武天佑字繁祉號靈承明甫姪纔四歲口授書即不忘少長專務
性理之學年十九詣京省季父文端公文端公叩其所學應對
從容源流畢貫命之試試出文端亟賞其文及放榜無名季父
意不平公曰姪遲一日功名多一日學問叔何憾焉乃辭歸閉
戶與弟讀書至承安四年登詞賦科狀元及第初授翰林應奉

文字泰和三年章宗詢及河洛公舉疇圖表補之義明白闡發
上嘉曰眞翰林進公經筵講官公進講每以存天理遏人欲進
君子退小人爲言八年勅命公典試時當道有所託却之遂失
當道意數年不調時蒙古猖獗西京留守忽沙虎驕傲不仁士
卒離心公以爲憂上安邊三策會帝崩不果行及衛王即位上
章言蒙古作亂緣我將驕卒惰耳陛下即位之初宜簡士卒謹
烽燧擇有才望大臣督之庶保無虞不然臣恐西京非國家有
也策上不行及泰安三年蒙古攻西京忽沙虎果敗上怒欲誅
之虎懼遂與其黨剎衛王迎宣宗立之遂上章乞休與弟歸隱
所著有經史撮要大學補及言志等集崇祀鄉賢

武天和字繁禧號猶龍天佑弟賦質異常見書輒如讀過偶入城
適有鬪者見公驚相顧鬪遂止其手采動人如此泰和中以經
義科狀元及第傳臚時上問曰汝明甫姪天佑耶曰唯上喜曰
汝叔姪昆季連中三狀元雖爾一門之慶亦邦家之光也因御
書三狀元第四字令懸於門以榮之初授翰林應奉文字補尙
書省令史時權倖欲援公兄弟爲黨公不應甚銜之及章宗崩
衛王即位公上書其略曰今朝廷之上君子謂小人爲小人小
人亦謂君子爲小人倘不之辨其不至結爲朋黨以敗國事也
幾何且小人動輒左袒小人直欲使舉朝皆爲小人而後遂已
之奸心動輒媒蘖君子直欲使舉朝不爲君子而後快己之忌

心云云於是權倖思陰傷之出公爲利州觀察判官尋轉歸州觀察使司崇寧元年得李公翰林應奉承旨獻能疏仍入爲翰林侍讀尋陞學士時蒙古氣正熾朝廷不爲意公上章條陳邊事甚悉不聽遂與兄並乞致仕隱居樂天園杜門不談時事生平愛武侯靜以修身儉以養德數語揭之座右以教子姪所著有永言集典內外篇寧儉彥語等書崇祀鄉賢

趙安時字全老號東岡貞元中狀元及第官中順大夫南京路兵馬都總管上騎都尉永定軍節度使天水縣開國子食邑五百戶賜紫金魚袋崇祀鄉賢

趙安榮安時弟天眷中狀元及第官朝請大夫永定軍節度使崇

祀鄉賢

趙文昌泰和中進士仕至京兆轉運使嘗有詩云蟲聲連墜壁樹色入秋窻草香花落處山黑雨來時爲時所稱

姬守中大定時人工書尤善行草見龍岩寺碑

韓德輔藏書萬卷善事母享年百六歲有五子皆承家學其季天祐舉孝廉

李曼森長子天德三年進士幼能賦任隰州軍士判官號稱循良從祀隰州廟庭興定未贈朝列大夫長子伯疇能文善騎射次仲立明昌二年進士歷政平化平秀容三縣令考績爲天下最終河東鹽鐵判官以中憲大夫致仕

李晏森次子祖若父皆宋間人晏性警敏誅蕩尙氣節皇統六年登經義進士第調岳陽丞歷中牟令會海陵方營汴京運水於河晏領之晏以經三門之險前後失敗者衆乃自行臺以水散投於河使上取於下流人便之金世宗素識其才名尋召爲翰林繼以詔赦册命乏人選外任文章之士因舉晏遂遷直學士轉吏侍郎兼御史中丞有朝士以病謁告世宗意其詐謂晏曰卿素剛今某詐病以宰相親故畏而不糾耶晏對曰臣雖老平生所恃誠與直耳病而在告此小事臣容有不知畏宰相何圖焉旣出自送之日晏年老氣猶未衰初錦州龍宮寺撥賜民戶輸稅於寺僧久之皆以爲奴役辱冤苦不堪有欲訴者輒殺之

國川縣志 卷九
島中晏乃具奏世宗怒呼辨再三而後獲免者六百餘人章宗立畫十事以上謂宜輕租稅尙寬大等語又奏乞待制修撰官宜更直進讀陳言文字以廣視聽授沁南節度使致仕後復昭義節度使明昌六年歸老詔除其子仲略爲澤州刺史以便侍養年七十五卒謚文簡著有游仙集

李仲略晏子聰敏力學大定十九年詞賦進士爲澤州晉城令遷尙書令吏除翰林修撰一日奏事退金主願近臣曰仲略精神明健如俊鶻脫帽未幾以親病求侍特授澤州刺史父喪免起爲戶部郎中俄授翰林直學士充經義讀卷金主曰有司謂經義不如詞賦罷之何如仲略對曰經乃聖人之書明經所以適

用不可罷紇石立執中坐賊仲略鞠之當削奪一時權要皆言
太重仲略奏曰教化之行自近者始况執中兇殘狼愎豈可宥
授山東廉訪泰和五年卒諡襄獻

秦略父事軻有詩名善書略少舉進士不第即棄不仕以詩名河
汾間自號西溪老人有集行世元遺山有送詩人秦略歸蘇墳
別業詩其臨終詩云軀殼羈栖宅兒孫邂逅恩雲山最佳處隨
意著詩魂崇祀鄉賢子彥容爲黃冠

按唐時寓賢有秦略非金源時善詩之秦略別入寓鄉傳

郝震字子陽父祚自潞遷陵川經之曾叔大父也讀書不尙訣聞
不求世味以經旨授學者析以天理人情而不專以傳注彈琴

得古遺音一日於道院松竹下鼓琴而歌睡鶴十餘驚起鳴舞
珊珊憂憂曲終乃去兄弟七諸兄以族大稱長兄之命異居震
涕泣三日不食曰諸兄得欲而生我將服義而死諸兄懼復聚
廬同食以終年四十九卒初名且自號東軒老人

郝源字清卿父曷曷即震之長兄郝氏以治經力行爲本曷以嫡
長蒞家有法制源以次秉家督時昆季十餘族長穉百餘口旣
總家事乃會戚屬告曰衣食足而知廉恥倉廩實而知禮節士
所以忘義失守至於沮氣墮節殆多逼於飢寒故孟子以農桑
爲三政之本今某以次爲家督欲諸宗親子弟治生爲學二者
兼進始則仰事俯育終焉立身行道進而得則各大爾家退而

失則必有所歸不至於落魄無賴亦足以爲善士夫少有大志不事家人生產雖或成就有過人者而爲書傳所稱亦非教育之良法乃量子弟之才器日畀汝田汝率農人治之畀汝桑汝率諸婦蠶之畀汝錢汝率商人治之畀汝書汝從某師友治之余則均其有無而察其勤惰其在家鷄鳴而冠依杖而立於庭諸房子弟婦其盥漱筭總黎明以次省於舅姑父兄退而各執所業或少有稽緩則責之庭少廢禮者則加鞭扶至於再會宗表列其狀而加之罰飲酒醉者有罰衣冠不正者有罰事師不謹者有罰惰於學者有罰相碁間者有罰譁於庭者有罰中堂日棣華歲時燕集上下肅然二子輿輦輿字正之博學能文歿

於兵

郝天挺曷子其高曾以下皆學而不仕天挺始赴廷試以太學生
顏翥摺紳間崇慶之變束載去之貞佑初入爭南渡阨於河上
下千餘里流民數百萬死者十七八天挺乃貽書機察使范元
直曰昔昭烈當陽之後既窘甚猶徐其行以俟荆襄遺民曰成
大事者必資於衆人歸而棄之不祥君子謂漢統四百年此一
言可以續今河朔民獨非子乎乞詔河津聚公私船晝夜放波
以救遺民書奏即日放渡河朔之民全活甚多其教學以治經
行已爲本太原元好問常從學進士業天挺曰今人賦學速售
爲功六經百家分磔緝綴或篇章句讀不知幸而得之不免爲

庸人又曰讀書不爲藝文選官不爲利養惟通人能之又曰今之仕皆苦飢寒不能自持耳丈夫不耐飢寒一事不可爲子以吾言求之科舉在其中矣貞祐中居河南往來淇衛間爲人有崖岸耿耿自信寧落魄困窮終不一至貴豪之門興定元年年五十七歿於舞陽客舍子思濫歸葬於家

郝天祐字賢卿初爲學即不作泐科文太安未知有後隍之變益遯默貞祐初南渡隱居魯山作爲詩歌往往散落人間玩意書法云當以篆隸意爲本大字雖大而小小字雖小而大正書須有草意草書須有正筆其論書如此趙內翰欲致之京師即避去山林人復知其處又欲薦於朝又避去元裕之間其又遯乃

以詩相招復以詩絕之壬辰沒於兵年四十九一子思直博學能文亦沒於兵天祐弟天祺二人皆治經篤學不仕

郝思溫天挺子其先自八世而下皆同居業儒不仕教學以淑其里思溫秉資剛潔與世不偶年二十隨父下太行往來淇衛貞祐南渡族行父遭疾謂之曰郝氏業儒自吾叔父東軒老人始我葬墓側庶得奉杖履於地下既祥將歸塋父兄以河朔兵亂不許乃夜啓殯負其骸以遯翼之行渡河至長垣資用爲盜歟從行者散去獨與妻許徒步負骸登太行盜掩至將兵之思溫時正病目暝不見物許獨不動盜曰若何人獨此不去所守者何寶許曰此我翁之靈將歸塋者有死而已其可去乎兇少沮

詢之曰我陵川許氏也昔兄曾脫盜盜驚遺白金數兩去時隆冬雪盛思溫目昏冒行風雪中不復辨蹊徑望峯巒爲的許時掖思溫而進纔半塗已入夜黎明始出山再日達陵川克葬元光復渡河三年卒卒之頃整衣冠疆起咄喏曰發志氣遂瞑教人必以小學爲根基曰人之始生真醇未離先入者爲主終身由之而不能去歐陽子謂顏狀未離於嬰孩高談已及於性命未可也語子經曰士不能忍窮一事不能立染指垂涎之氣不除負鼎滔天之心常在能堅忍決若長河而不回屹若泰山而不移然後爲大丈夫晚年遂性理學手書西銘界子經曰是入德之幾造道之階也門人苟宗道等曰先生不苟祿仕困而不

撓臨終而猶以志氣爲言不亦卓乎諡曰靜直未嘗祿仕可稱處士子三經彝庸

元郝經字伯常世爲陵川人天挺孫父思溫生三子長即經幼父母挈避亂河南衆數百皆匿窟室敵索知薰穴而死者殆盡母許因咽塞而絕經甫九歲匍伏得黃齏一瓶又得密一器用母所佩剪扶齒以密和齏汁飲之頃而蘇旣長父欲理家事紆目前急母以其志氣不凡且郝氏世業儒令經力學於是朝執薪水之役晝營幹家計暇即讀書不輟張仲安識之聚童子俾教學刻苦肆意者五年遇疑難期必得常自誦曰不學無用學不讀非聖書父命名經蓋以專學望之故慨然以興復斯文道濟

天下爲己任元帥賈辟公授經有書萬卷蔡國張萬戶館之亦有書萬卷得恣博覽元遺山見之曰吾子狀類先生才識間出有所積而然也江漢趙先生曰江左學如伯常者多視伯常挺然一氣立於天地之間蓋亦蘇矣元世祖在藩邸召之不起復召至見於沙陀告以二帝三王之道上立國規模二十條有一國規模天下規模萬世規模會大舉伐宋經乃具奏以爲古之一天下者必已之德澤深厚紀綱完具彼之荒淫亂虐敗亡有釁天命人歸一舉而取之今地醜德齊驕肆妄動輕則見沮而還重則覆亡之不暇我國家開創以來彎弓躍馬窮征遠討四十餘年紀綱未立民不聊生彼之君臣輯睦政事修明無釁可

乘我乃空國而來僥倖一舉諸侯窺伺於內小民彫弊於下人之攻我者不啻數十百道而不備乃利人久備之道而攻之臣見其危矣退而著書義名之曰七道凡七千餘言頃命副楊惟忠爲江淮宣撫使楊以私故欲還汴梁經爭不可楊怒經竟建旆而南楊懼即俱會大師於江上後全師綴於一寨死傷甚衆急奏按兵明年即位開平召使宋或勸稱疾經曰吾學道三十年無益於世今天下困弊已極幸而天誘其衷有意息兵解兩國之鬪活億萬生靈吾學爲有用矣遂赴召以爲翰林學士佩虎符充國信大使告登位布通好弭兵息民意請與二三蒙古偕行不許曰只汝等往彼彼君臣皆書生也且賈似道在鄂時

已請和於我矣行省李璫實不喜和先達知宋乃止經經以璫言聞而行既邊師仍侵略宋境經責以不遵約束至徽州館於軍營謂李松壽一再犯邊故且留儀徵又出李廷芝書云信使以美意而來松壽乃懷奸以逞殆類款兵誤國械李璫敗將爲左驗時平璋王文統忌經本欲擠之外出宋亦不遣牒三省又致書似道上宋主闕下辨戰和利害前後凡數十萬言抑之不報經曰吾惟有忍死以待守節不屈耳宋亦不加害反敬之厚其廩餼著書吟詠自若至元十二年問以執行人之故始禮而歸凡十六年明年疾革書天風海濤四字而卒年五十有三初圍鄂以國喪而解似道冒却敵功拜相後秉政諱其事以故久

留經使不得見經歸而似道誅又明年宋亡其在徵時有繫雁
帛書事歸後始獲雁於他所曰金明池神之也所著有續後漢
書奪魏而與漢黜奸雄之僭偽續一代之正統又以春秋聖人
用道之書作章句音義及制作本意比類目共若干卷使讀者
得聖人之旨趣又作三傳折衷凡四書總名之春秋外傳合十
餘萬言以易諸家傳注議論不一著周易外傳十卷又爲太極
演原古錄通鑑書法玉衡眞觀刪注三子一王雅行人志各數
十卷合十餘萬言經拘留宋中不與世接反得究竟著述子一
采麟集賢學士朝請大夫歿後贈榮祿大夫司徒柱國追封冀
國公諡文忠崇祀鄉賢詳元史本傳

郝彝靜直君仲子經弟也經明行修仍守高曾學而不仕之義正
如東軒老人無復世味者

郝庸穎州知州經季弟於兄經使宋之二年請介行人以問罪遣
之宋不納後十年又請會議不可明年又請不得已復遣之至
建康而還幾死者凡十數其師劉因曰事雖無成亦可與有爲
者

李平廷實祖制行修潔金時應詞賦未第就稅課使推輝州酒務
使後避亂河南挺身諸李牙山麾下議論出人意表遂推爲帥
府經略藉以援活者數十人元紀混一乃歸里鄉園戊戌選試
儒人用賦論中選常訓子孫云修身莫如學問治生莫如業農

以孫廷實積官贈亞中大夫追封隴西郡侯長子義即廷實父
舉孝子次和善書法吏事次欽順德府教授事見廷實神道碑
趙安正鄉舉明五經

王好古由學正累官河中府判明五經于毛詩尙書尤得要領通
蒙古文字

李義平子子廷實碑記云至元十年就試於博明經中選大德中
以廷實調單州教職因家於單父義一生樂易康泰不奪於俗
幼失母繼母龐鞠義如己出義孝龐如所生龐有疾醫不效義
稽顙比辰願以身代繼乃剗肌肉一片和藥以進跪告龐曰兒
別得善藥飲之即愈已而果愈人問何藥不以告久之人見其

脇左有刀傷痕始驚悟其事詔旌表後以子廷實貴贈嘉議大夫禮部尚書隴西郡侯祀鄉賢

和居正性敏學博友兄弟篤朋游潛德弗耀以高年耆碩旌表其閭

魏夢臣前志祇存郝文忠送行一詩今摘藝文傳疑

蘇叔華尚書萬初叔父遯野有詩名

李廷賓皇統中進士爲單州教職因家於單父後以順德教授人椽選國子助教翰林院奉修撰知制誥歷國子監丞拜監察御史尋爲國子司業階朝請大夫適缺祭酒不得辭哀二親在淺土力未能葬以中憲大夫出貳濟南去單爲近葬二親於單焉

後仕至禮部尙書致仕

申如魯進士江西廬州府推官著春秋五霸說行世

婁裕官承郎河中府通判有詩集

明和元德以文行稱趙晉間嘗被薦入朝以疾辭結廬太行之巔

題曰默齋宋憲濂爲作銘載藝文

李鳳唐順中十五子福王綰之後其高祖順封陵川男曾祖思溫
靈州知州祖約贈御史父川賓懷慶推官鳳在永樂中以明經
任順天府通判生平質直不爲崖岸與人交必誠必信居家以
詩書爲世焉見邑人張瓚碑記

和維景泰辛未進士和爲陵川著族代多名賢維文學冠世天順

中遷浙江提刑以外臺去西湖不半里時與僚友登高望遠日
接湖光山色繡古興懷因重刻楊鐵崖西湖竹枝詞其序謂使
騷人墨客游於湖上者酒酣扣舷對兩峯歌此曲神交前賢於
烟波浩渺間子璋成化中亦成進士

張瓚天順庚辰進士堅苦力學與同時薛文清瑄王家幸一夔砥
行立名卓毅不拔由戶部主事出知臨洮府剛直寬和滿任去
民留其履官至陝西行太僕寺卿多所著述從祀鄉賢子信舉
人判岳州有廉能名卒於官

王曷成化丁酉科經魁任河南南府通判所著有嵩洛稿

徐澍成化中鄉貢承張太僕瓚之學與瓚子信同以通經學古名

於時

王道宏治中舉人知陝西朝邑縣正德戊寅太陽諸里民田千頃
淪於河無已請折糧以布又縣當要衝不置驛民疲於奔命且
與蒲華等偏枯爲累特甚請得郃陽登城協助民稍蘇屢雪民
冤境內麥秀有三四岐者民有瑞麥歌後遷判河南著有六泉
集

武思明宏治壬戌進士知江南金壇縣廉明公正好士愛民性情
淡泊蒞任未期奸吏遁跡民稱神君崇祀金壇名宦居鄉篤於
慕古雅有志操推誠立教門多聞人從祀鄉賢

武思孝官宗人府亞中大夫宣寧王府儀賓著有少原集

和景曾以孝友上聞應詔官蜀府典寶玉器重之命圖其像親贊於上

徐河貢生義士鉞之子循循禮讓爲時碩彥父歿哀毀幾絕旣葬廬墓三年事聞旌表

徐洪河之從弟父服賈外出歿於揚州洪徒步扶柩歸葬廬墓側有蒼狼馴擾之異事聞旌表誥封亞中大夫

李璠義重鄉評立家塾訓子弟孝友和睦自曾祖約祖景隆及父盛子珂孫鐘六世同居事聞旌表

徐滔自高祖貴以下曾祖叔祖璣父鉞及姪樑孫輝七世同居食飲同案誦讀同堂而徐鑽徐河徐洪等咸廬墓輸粟敦孝義者

累世不絕先後上聞累旌義門徐氏

徐休滔子任慶府典寶有詩集

武儀歲貢生任內邱王府教授封登仕郎有詩集

趙思義行誼著聞鄉國尊禮縣令特舉爲公直每朔望詢以民間疾苦政治得失思義之義洵可傳焉

牛耕平城鎮人正德六年流賊陳卿率衆突入太行至鎮執耕問曰陵川與壺關孰遠近耕給曰壺關近且平陵川遠且險至壺關界詢衆尙遠賊以誑已遂刃耕之西火鎮兩邑胥免難

都永思嘉靖乙酉舉人知河南新鄉縣縣事著有壬子集

武錫嘉靖乙卯舉人初任伊陽令仿程純公遺意建學齋一百三

十六間大小器具悉備以處士立社學五刊養正編訓之置義田二百畝公用千金取百婚而足自奉極儉疏永昌渠六道以溉民田建倉貯穀萬石備荒政開廢業招流亡凡七百餘戶公清心寡欲凡審案民皆願就伊陽理移尹江寧有異績會一庫吏役滿盜庫錢事發當事欲周內之因矢於神次日當事者暴仆得雪遂掛冠歸大府咸贈歸裝民立祠者六並爲著德政錄叙其美文翔鳳名宦祠語云毀淫祠爲驂館捐贖錢爲講舍召杜之名不朽父老之眉尚沅曾民間有血食而鬻序弗載主允隆俎豆以光蘋繁所著有尙書各篇經書撮要四書小補及西崖等集

王充耘道子不樂仕進構知止菴終身隱處其中賦詩見志縣令知之表其門

王充耕充耘弟選貢任棗陽縣令有詩集

李顥邦麒子初爲諸生抱奇負異不樂仕進孝弟力田以終其身婁繼志幼習舉子業不遇遂不出敦宗陸族優游以自適其趣大府魏高其節以居鄉有道稱之

馮奇遇邑諸生入試不偶力穡事以自給隱居蘇村與諸名輩日適觴詠人號爲山中祭酒

李時芳顥子世家華胄奉讀父書敦倫守道不務聲華沁水尙書孫居相授精節之例採貞曜之評私謚曰貞靖文字

馮時亨嘉靖丙午舉人居家孝友初通判濟南府清馬政修漕河有守有爲卓有可紀擢陝西金州知州政修民和時有巨寇何勉嘯聚不軌官軍勦捕亨特任紀錄兼給軍餉寇成擒其贊畫居多有德政錄從鄉賢

劉可孝廩貢生文爲世則行重鄉評裁成多士以教授終老子宗顏任白河知縣

劉鎮威邑貢生雖處困厄而悉力學不以事物經心卓居衆材之上教淑鄉井以義行率諸生孝子王國材孝廉韓國賓出其門王孝清修砥礪其子長國熙萬泉訓導次國勳萬歷中鄉貢和應光元化祖事母以純孝稱居鄉以謙謹稱

徐樺深於性學博通經傳倡教京國大河以北咸師事之諸復其
家

婁西貢生事母極孝母常寢疾晝夜不離雖隆冬盛夏無少閒及
母歿哀毀逾禮水漿不入口者三日既葬廬墓

韓國賓萬歷癸卯舉人著有鳴野集

李萃秀萬歷壬子舉人已未進士副榜用賓七世孫邦麒之曾孫
與兄培秀同以文行著嘗立軍田五十畝佐理閭及族人婚喪
事精於史學方太史拱乾陳太史于鼎目其文云眞所謂胸中
有萬卷書筆下無半點塵者結淡寧社與伯兄培秀課子弟杜
詩杜言等於中講學論文一時名輩如和元化趙一心韓萬物

王圻王有慶協慶武立統王廷誨皆出其門著有醉笑軒集

劉宗顏萬歷二十二年選貢任漢中白河縣知縣可孝子也學有
原本性復剛介不諧於時俗不逾年歸休而家擔石在官之清
節可知子若孫一經嗣守蔚爲詩書之族

李世芳邑增生品端學優爲族黨所推善大篆工說毛詩邑生請
業者履滿戶外

徐應奎棹之孫瀟灑任達寄情詩酒作百字歌以自況著有清居
薄採等集傳世子騰雲騰宵

李大芳顒之子邑諸生直亮好義有妹適宋早寡而貧與兄時芳
等共割地二十畝膳養五十年俾全節以終其身

徐之中授訓導遠於世好篤於學行邦國皆推重之三舉鄉賓

徐教邑增生授儒官養氣父孝弟睦嫻好施慕義不求仕進棲志

林泉

曹懋德由貢授訓導以師道自任開門授徒置義田贍族人爲閭

黨楷則

曹之珩授訓導撫幼弟成父志行誼端淑累舉大賓

徐騰雲貢生應奎子事繼母孝人以爲小閔子有司以孝聞涕泣

辭邑令至每式閭焉事親竭力奉甘旨文太青內翰謂其事繼

母如生母撫從弟如親弟尤人所難私謚孝文先生所著有千

聖心法尙書珍鈔及語錄等書學者相與稱徐先生晚年舉二

子逢泰還泰

徐騰霄邑諸生居家孝友爲庠序典型高節懿行右古人風規
李桂香世芳子邑諸生恂恂恭謹守讀父書家無斗筲晏如也化
導鄉閭樂天知命澹然榮利

徐啓昌能詩工書法胸次磊落廻然出塵授訓導

武陳策通性理熟史學至誠純厚文行兩高授署丞

徐任重儒官善楷書尤工擘窠大字刻有碑版傳世

李大良鄉貢生樂道居貧教授鄉里士出其門者甚衆

和暖世家子不事羈屐風流而浸淫於卷軸負才終於貢子元化
爲名進士

牛麟趾鄉貢生專經學精傳注纂輯經書粹言以授諸生子星顯亦以學行名

王廷誨讀書慕道俊邁逸羣孤韻獨絕其品槩見梅花閣

牛健考授外郎性秉孝義輸粟賑荒敦倫盡禮鄉里敬尊

李爭榮邑廩生稟行孝友鄉黨無間然且以淹雅稱著有常惺惺及功過錄諸集

李杜詩見和元化序碎錄爲杜言兄而秦之鉉序媿魚草則云杜詩者達道而窮者也窮如遇未必窮於言達於道不失爲公輔又云杜詩磊砢多才慷慨類燕趙氏而不著姓名按和氏序其爲杜言可知因摘其語列於杜言前

李杜言秉父兄訓而達以天才雄邁絕俗風流人豪著有鳴情碎錄以所作古詩歌填詞樂府隨筆隨錄和元化爲之序而傳之路中行貢生勤學篤行其精敏誠切之實著而人多效之見埃山碑

婁鏜邑增生明試諸生屢見賞識而終阨於遇白首窮經精神益振

傅天錫銳志學業不屑屑於經生家言號稱博雅君子見松窻痴軼序

秦廷璧與路中行輦同受業於孝文光生之門不隨世爲戚戚獨行君子也

陔川縣志 卷九
婁凌雲邑諸生西之從子父疾衣不解帶湯藥必親嘗累數月不
懈及歿凡附身附棺者一秉家禮既葬廬墓三年

婁銓凌雲孫父抱疾彌年扶持無怠父病隆冬思瓜時大雪不易
得銓冒雪重走百里覓瓜以進父歿哀毀骨立家貧奉母必極
甘旨不以不足缺供有司屢加旌獎

曹民信邑諸生幼喪母痛哭垂絕不飲食欲從以死父歿哀戚逾
常十餘年骨見衣表事繼母晨昏定省不異所生事聞旌表清
崇祀鄉賢

朱廷彥貢生節婦徐氏子生夫父而長就學於舅氏能承母志勸
學不輟母老竭力奉甘旨以終天年宗族稱孝與母節同旌

徐居仁諸生菽水養親必誠必敬凡昏定晨省冬溫夏凊之節一以誠行之公舉得旌

王佐才邑學生學使者以孝行表其鄉

王國才鄉貢生事繼母奉長兄敦族誼鄉隣推其溫厚豈弟君子也

武立綱邑學生事祖父母克敦孝行見重鄉黨訓弟若姪率爲成材

王一欽邑學生七歲母歿繼母張虐遇之父以不賢責張欽泣諫及父故張病嘗藥祈代孝謹益甚異母弟一欽感之勸張以恩待而張竟爲慈人稱爲小閔子

李培秀崇正年貢生積學種文學使者延主河汾書院癸酉流賊逼城王觀察肇生詢謀略縣令王乃以培秀薦委以城守加城垣高五尺賊渡河去城卒全事可篤孝年八十疾封肉以進隱而弗彰逆氣未殄遂岩居不出自號孤山處士著孤山問叢集董時增千總崇正五年流賊逼境巡道王肇生來授幾不免增以身捍之殺數賊而死

斬朝鮮千總崇正五年山賊竊發朝鮮與之戰死之

段章美邑諸生教授毓秀子崇正五年流寇逼掠被執章美大罵不屈遂遇害

路如瀛崇正元年貢初任沂州同知後補臨清州同知署本州事

十五年閏十一月賊破城殉難

武柱國邑武生崇正三年河曲賊老獬由汾州平陽曼延至邑之奪火鎮以爲巢穴時冀南道王肇生厲志殲賊幕壯士爲前鋒柱國與邑人董時增斬朝鮮往應募斬與董先後陣亡柱國瘡痍之餘任前鋒領兵殺賊賊平授冀南道千總十七年蔡巡撫懋德名勇幹才邑令朱奉鏞以柱國應蔡異其局幹奇偉因念平獬功賜以額曰壯志請纓以勵之即命下潞澤督餉奉檄出未幾省城陷蔡殉難柱國號哭數日亦卒

清曹邦偉以恩貢授江西定南縣令噢咻疾苦宏獎風流士民咸愛載之會金聲桓發難捍守孤城力竭城陷不屈以死長子翰

明次子際盛從子翊明僕伏新等十一人俱從死事聞諸贈江
西按察司簽事子祭塋廕一子入監從祀鄉賢

和元化順治丙戌聯捷維璋之裔孫鄉貢援之子任新鄭縣令有
惠政卒於官百姓立廟祀之治行文章卓然於時惜早歿未竟
其緒

秦之鉉字鼎黃弱冠以能文名風流倜儻功於詞賦順治丙戌聯
捷初任陝西莊良縣丁艱起補江西新建縣自武金壇後邑中
甲第寥寥自之鉉與和元化聯鑣而起歷任所至政聲遠聞崇
祀新建名宦有閩素草汾水秋滕玉閣詩等集行世

趙一心順治己丑進士鄉會皆亞魁任長山縣令高才絕學治績

尤著清勤前志云懷范滂之大志類屈原之孤憤抑鬱憂思遂歿于官著有北征草

楊一藻字煥章廩生姜逆發難破城藻慷慨與邑侯李向禹同時犯難知縣黃國燦按臺高一請于朝旌其門曰爭光日月從祀忠孝祠

秦克俊貢生知南豐縣死金聲桓之難而恤典未及人咸惜之從祀忠孝祠

徐還秦邑貢生孝文先生員嶠次子員嶠峻潔誠篤還秦殊有父風學博才贍以諸生老有詩名

李汝憑字虎臣中式康熙丙辰科武進士任廣西柳州府提標都

司固守龍城邊陲賴以寧謐因力疾勦賊卒於塗督府親爲致祭贈明威將軍品概峻整有儒將風

楊翔鳳以吏員於康熙十七年授貴州揚老驛驛丞時滇黔之氛未消八閩騷動驛當荆南要衝羽檄分馳夫仆馬斃又軍需屢匱幾難措手平越官吏多委印去翔鳳獨誓死勤事是時大府揚因事過驛見其難爲之增馬二十疋事平補平越訓導官兼署縣令事越九年轉邢台尉

劉奇聲歲貢生白河令宗顏季子白河致仕歸官橐蕭然奇聲甫九齡父歿居喪卽如成人及長雖困銳志於學博通經傳尤長於書教授鄉里諸生多有以文名者數舉鄉飲大賓經修邑志

有司旌其門

寧景俞邑貢生才氣高華號稱博洽喜聚書伏而誦之與弟珽相師友一室今諷藹如春融工楷法爲士林模則

武靖遠諸生廉介尙義邑侯孫移學宮靖遠捐修茶亭二座孫匾其門曰功高聖域邑侯黃重其品嘗極稱曰耿介拔俗壁立千仞所著有孝弟家訓遵耕讀訓說及唱和詩集

牛魁斗邑諸生幼孤奉母孝家貧無所得師恒以母紡車分光授讀武諸生高等母輒蹶然斗亦承顏色喜然輒慘戚傷父不及見也及流寇壓境劫其母魁斗哭請甚哀賊曰此牛孝子也遂舍之將貢而卒從祀忠孝祠

和方元化次子性孝友遭兵燹後淡于世榮躬耕奉母遯老窮山武毅邑諸生年十四喪父上無伯叔弱弟僅數歲惇惇母子相依爲命時復兵戈亂離有父遺田數畝距縣百里毅徒步負米養母後母子避兵東河數涉艱險嘗負米夜行荒山遇虎不爲害水驟至亦不溺縣令平重其行舉介賓胡令題其遺像曰處貧無怨臨難不驚克敦孝友天祐其行岸然道貌千載如生

任增建少失怙己丑負母避亂山中途遇兵以身蔽母跪泣求曰寧殺我毋驚我母兵義而釋之旣而母因驚成疾建事母病凡巾帟厠踰親自浣滌數載如一日建年九十餘鄉黨稱孝焉

閻實興縣訓導仲暎父七歲喪父弟方三歲能撫愛之事生母李

服勤順則儼如成人就外傳讀書至孝親旬即知向館師求解師逆知其天性孝友迨十七母病在床實侍湯藥三年未嘗頃刻離旣歿哀毀逾禮至七十歲無一日間可謂終身猶孺子慕者

姚文炳康熙丙寅拔貢廷試補教習需次縣令天性純孝入成均念父母不置恐親罹疾病恒寄藥物聞母病即馳歸及母病不起哀毀骨立廬于墓側朝夕哭卒侵風霜以死

劉惺邑增生奇聲仲子總角補博士弟子員孝友端謹不墜淵源尤善書邑生徐佐目之曰性天猶閔子書法如魯公

和姬化邑廩生少孤依母習讀忠厚忍讓人咸誦之曾遭劫掠恐

盜抵法竟寢其事

馬掄奇邑廩生孝親友弟鄉黨推重舉鄉飲介賓邑令平表其門
曰多士儀型

武忙靖遠子增廣生素性純飭品概端良孝繼母友兄弟爲文不
趨時好晚年始入邑庠學者咸尊其品誼

寧珽歲貢生孝友性成奉母李備盡色養母患痢珽寢處不離躬
滌厠踰及歿哀毀幾殆水漿不入口者五日絞衾殮具一遵朱
子家禮終身好學晚年不怠諸生就而折衷焉

劉堯封廩生才逸學博品卓行高篤于孝友不屑屑世俗事常注
藥拯人疾苦所著有學庸疎未竟而卒

徐疇歲貢生任祁縣訓導能竭力事父母父病親嘗湯藥及歿水漿不入口者三日寢苦枕塊百日不食醯醬期年食粗糲泣血三年未嘗見齒母歿盡哀盡禮一如之春秋享祀儼如生存宗黨有秉禮之目

武雅廩生年十歲父歿啼號淚竭喪面失血者十年遵祖訓順母心學業成就不負先志祖父母歿相繼承重不入內不飲酒食肉者六年母歿哀痛不欲生痛母苦節四十年竭蹶請旌載在郡乘

徐慧龍歲貢生生而純孝先意承志親疾親滌溺器扶持終始不怠

閻仲隱實子任興縣廣文器度圖厚性慤行方年八十外猶盎然
春和如少時道充德粹人也有子亦能承家學

劉謙廩生制行正直性嗜古不隨俗爲進退父早歿春秋展墓每
涕泗交集治祖母喪禮父志無弗中禮

都俞邑諸生文行爲庠序所推康熙三十一年邑令王舉鄉飲介
賓

李煥邑諸生篤孝弟敦嫺睦性恂謹居隣縣治口不言戶外叔無
子煥奉養如父又其姪少孤撫育如兒體恤族黨解推鄉鄰倡
修郝文忠棣華堂祠舉介賓人以爲不愧云

李旭桂香孫邑廩生淵涵經史行文必窮理境意在羽經翼傳不

苟投世好屢蹈省門無識之者性端確不與物忤朋游推爲老宿

牛冲漢廩生至性成親病衣不解帶湯藥必親嘗及歿喪葬一如禮制

王元郇諸生事親孝執親喪盡禮廬墓三年生平言行不苟惜早歿國人哀之

劉文岐邑令王舉耆賓當明季末年流賊入境文岐與其兄向岐負老父母子深山中採野物以養親數十日父母藉以無恙事平歸里人咸異之孫世筵邑諸生

劉忱邑廩生奇聲季子奉二親以孝撫兩姪以慈家徒壁立讀書

不輟六經子史靡弗貫治性不慕浮榮不爲科舉之學蕭然世
外

姚之鼎八歲喪母十四喪父稚年孤弱而立志承先敦宗誼篤友
愛事事悉體父志子諸生瑀列其事

王如且邑增生性至孝竭力事親飲食寒煖纖悉不遺時舉家染
病一月中父母繼亡如且病中匍匐親旁凡附身附棺一一如
禮學問優長教授多所成就

和添壽增廣生家貧篤學習舉業而不應試教授生徒忘懷得失
居喪不飲酒食肉者三年

楊鳳翎七歲父歿孝事二母凡養生送死悉如禮制年荒焚券鄉

里感之考授經歷

馮沅善事繼母七歲母歿繼母韓撫之韓病彌年食飲動作沅必親奉扶持一夜屢起者凡三十載無間寒暑生平足不出里門口不言是非終日默坐彈琴自娛享年八十餘卒

趙藩吏員考授經歷事母以孝稱事庶母以敬謹稱撫幼弟成立內外重其孝友又獨輸百金修家廟爲歷久祀享計藩之篤本根藩之孝友也

焦時雨十二喪母十三喪繼母十七事繼母邱與其父能盡心力家貧無以爲生走河南負米以養之邑令蔣謂其孝行堪爲一鄉表率舉鄉長留七年

武元勳考授經歷弟六人皆撫之至成立葺先祠修祖墓諸事悉竭力倡始

楊顯秀氣量軒豁不阿世取容與次子諸生培演感應篇中事成帙用以勵俗邑令平嘉其行錫之以冠

徐鍾靈舉鄉約秉公勤事鄉里服其平直邑令韓舉爲鄉飲耆賓旌其門曰義公鄉望一曰惟德動天

秦夏生平篤孝義孀母路早寡夏奉養不倦一子夏撫育之又爲族弟完婚配隣人趙權質美未學夏恐其貧而廢書招來家塾給以膏火權後得入縣庠其成人之美如此

武愿考授經歷好義樂施篤於宗族有族人慶懋懷惠莖親授室

皆傾囊助之且立書室積書籍備館穀敦禮先生訓迪本族弟姪輩武氏一門書香相樂不絕皆愿之力居多

馮君鎬篤於友愛兄歿撫二姪成立並以遺產讓之

武阡邑諸生爲童子不好嬉戲讀九經皆手自抄撮旁及聲韻之學父病親嘗湯藥衣不解帶者逾月歿後三日水漿不入口寢處苦塊致傷肩肘間及許漸積成瘡性嗜書聞所未見雖典質必購讀乃已環堵蕭然咏歌不輟年七十猶註解批點史記嘗曰儒者立志當以古今第一流人自期學者謚文孝先生所著有遺斑集

王繹增生幼承庭訓服勞不倦父疾親嘗湯藥失怙後事母氏承

國川縣志 卷九
顏順志孺慕之誠終身如一兄弟式好無尤教授生徒殷勤誘掖值歲荒出粟周急鄉黨德之

韓方昭增廣生鄉飲介賓品行文章士林推重學憲曹區其門曰品高士序

秦夢麟鄉飲介賓事繼母如事所生推誠立教里中有貧子弟不能就學者咸資給之使卒業邑令陳區曰士行克修施區曰文壇宿望

王德峻鄉飲耆賓居喪悉遵禮制待同祖兄弟如胞先業所遺悉以推讓比昆季相繼凋謝無遺孤贍孀婦無不盡心力爲之居鄉爲人排難解紛有以急告者雖自顧屢空必輾轉籌畫以應

次子希曾中庚辰科舉人

武彭齡歲貢生恂恂好讀書教授生徒數十年娓娓不倦論立品則曰當思不朽二字論處世則曰須明吃虧二字論讀書則曰當體吃苦二字恒以古之學者勗人博聞多識于邑之文獻留心授輯衰集成帙修志乘方欲採取巧据惜遺失無存矣

郎彪兄弟六人父在時兄弟等欲析居彪亟勸孟未允彪謀于仲兄欲服賈獨力養親不願受產伯兄悟仍同居如故鄉黨中稱其孝友

魏振卿鄉飲耆賓年十九父母歿廬墓三年咸推至孝性成

張玉龍拔貢生善讀書能文章教生徒多所成就任芮城縣訓導

見人士頹靡殷勤訓詢加意鼓舞不數年人才蒸起文風不變焉

趙克敬庠生與從兄同居五十年未嘗忤兄意見兄病親調藥劑不離枕席兄歿待從姪與子姪爲一體四世同居不言分析設義館延師聚村人俊秀肄業其中先後入泮者幾四十人

姚彭家赤貧擔負爲業事寡母盡孝兄歿時遺孤甫三歲彭教養有方嘗向母泣曰吾子有失尙可有子吾姪有失宗嗣誰繼歷三十載卒能教姪成立邑令陳給匾嘉獎擬之鄧伯道

段德麟字玉書溫和敦厚生平不苟訾笑聞議人過輒掩耳避之邑有侯姓者曾爲其子聘婦於某氏後某欲敗盟知其貧故厚

索聘金於侯侯窘無所爲計公聞即傾囊贈之卒完其婚其好義樂施類如此

馬班邑庠生事親孝教子勤立品端方鄉閭表式子司教庠生克敦士行父子俱公舉介賓

武敦字厚甫經明行修學有根底乾隆癸酉舉於鄉家世積善敦尤急公墓義婚葬凶荒多所俟助於邑中公事竭力倡始寺觀壇廟每興大工慷慨樂施素行爲人推服

秦懋效字松嵐乾隆丁酉拔貢官直隸深州州判工詩尤長五言清微淡達直登沈宋之堂而入王孟之室統名燕南趙北詩草爲陵川六詩人之冠

武維藩字价堂高才絕學博通古今性豪爽日下交游冠蓋相望
以選拔入闈主司得卷擊節歎賞已列亞元因未塲經藝誤印
題紙臨榜被黜事發奏聞補入科塲條例嗣挑取謄錄充武英
殿校對候選教諭歷任孟縣夏縣勤於課士刊吳信辰四書題
詩以啟牖後學告歸後請以丁歸地糧免田民之累卜築別墅
號小南庄日課子孫楷法馳名四外求書者戶外屢滿老而不
倦著四書聲韻詳註己梓子風彩鳳三以名諸生貢成均

王伯儀號雪農拔貢生文才高瞻尤工詩賦析成王楓船侍御泊
水竇斧塘太史俱出其門一時宗工推爲風雅正宗從康伊山
學使遊幕關中卒於渭南

和友邦號曉園潛心力學讀書外無他嗜詩文清微古淡瓣香於
王孟韋柳諸家晚年境益困難雖厨中無詠米吟自適入棘闈
十餘次薦而未售以歲貢候選蒲縣訓導終於官

王琚字崑圃貢生好爲古文力追韓柳歐蘇諸大家工詩與楊雲
亭齊名一時有王楊之號

傅弼字築巖貢生幼負才名作爲文賦皆奇恣博麗爲名醫懷西
先喆嗣故尤精岐黃寓晉陽時撫軍藩臬皆延爲上客以書主
後身著滋雨山房集散佚罕存

楊灝字雲亭貢生有詩名爲邑六詩人之一

曹旌忠定南公裔孫少有膽識遇事敢爲嘉慶間詔恤定南公後

陝川縣志 卷九
始勅世襲族人無敢應旌忠獨赴京引見遂承襲恩騎尉累世
罔替以千總歸營試用委署本邑城守營弁人僉榮之

楊爝豫成父教讀終身曾館高平祁宮保家博極羣書篤志功名
踏并門秋風十二度屢薦不售以明經終

武威遠字安亭歲貢敦品砥行以嚴正爲閭里所彈嘉慶癸酉豫
匪入界邑令議守城威遠毅然曰守城不如守山山在則城無
庸守山失則守城無異况五百八十三庄生靈甚衆是彈丸者
即令能守其所全幾何也卒從其議遏賊西竄之路城賴以完
又邑中地糧向係以釐爲分民受其累商於邑侯力詳 上憲
卒革其弊其強毅有爲類如此

楊燧號曉園增貢生型家有法善處兄弟之間爲閭里矜式其卒也高邑祁恭恪公爲誌其墓子觀曜官至四川觀察使

寧衛卿字愚亭性溫和而學純篤有聲文壇劉公紹先登賢書求示闡稿一見輒喜曰我知所以得之矣次科庚申恩榜果舉於鄉居恒樂敦善行修社義倉捐鄉會費僉爲倡勸晚習岐黃以經人

楊乾初字葆元少承家學風流跌宕善屬武嘉慶戊辰中式丁丑大挑分發福建初署寧洋縣事詢民疾苦讞獄虛公詳慎設循環簿按月申達上憲喜其平允檄各州郡視以爲式勸興學校刻作詩法寧士習聲病者始多旋題補邵武其課士如在寧尤

爲添設膏火體恤寒峻兩次調簾分得元所取多名下士人服
其賞鑑在邵去串都之害興聯甲之法東北有天羅磔者俗號
小臺灣棍匪相依爲奸殲厥渠魁積弊爲之一清又於城北河
口募修義渡戒水手之需索行李往來口碑載道甲午歲霖雨
四旬籌米平糶慮滋事者煽貧民爲亂憂懼未幾卒於官刊本
邑六詩人稿著就正詩文集卒以行世子長春官工部郎

張翥工篆書潛心學古嘉慶癸酉選拔陪貢旋中副事以母氏苦
節竭蹶請旌於邑之公事躬親倡率好爲人排難解紛終身不
倦

劉儒鳳平城人博學能文尤精左氏春秋嘉慶戊寅舉於鄉任潞

安平順縣學數年告歸終於家

馮式蘧三泉村歲貢以古學馳名律賦膾炙人口喜慶間應五台
召試屢冠羣英以數奇爵賞卒無得

都長壽號眉山副貢文壇夙望日課數十藝援筆立就出其門者
試輒高等采芹如拾芥善爲初學津梁著有敬業齋稿門人婁
仲選梓以問世

秦萬壽字恒山歲貢生教授閭里以嚴見憚嘗博考載籍輯郝文
忠公年譜附文集後

馬延年耄而好學娓娓不倦累踏并門薦而未售嘉慶丁卯賜副
榜戊辰賜舉人已已入京師賜國子監學正里人區其門曰鴻

恩三錫

李薪池下村職員富而施道光間歲荒雜粟於糠量濟村衆全活無算明春復出麥百餘石以施種生平積德至今戶頌焉

薛鳴皋字鶴亭品端學粹未冠登賢書旋成進士分司銓部熟悉例義多所改定則例館冊署爲總勘以銓選屢與上官抗辨守正不阿二十餘載幾老部曹後因廷章交薦遷監察御史遇事敢言絕苞苴有關節不到包老之風未幾告假歸捐二千金置澤郡試館於京師返里修廣惠倉利賴甚衆主講邑書院以實學勵諸生翁稱爲道學咸豐九年卒於家別有傳

王汝楫號松舟孝廉希曾次子有名士風流游京師以明經肄業

太學與竇斧塘太史王楓船侍御相頡頏報滿用學博候選歸
家居柵木山莊詩酒倡和座客常滿自號西溪老人著有西溪
詩集婿楊觀察梓以問世

楊豫成字立之博綜經史性耽吟詠教授於邑之寶應寺者十載
道光元年舉於鄉十上春官屢薦不第甲辰大挑分發江西署
安義縣事值歲祲平糶緩征民感實惠旋題補龍南懸巡四鄉
懸格捕盜獲名賊百餘縣境肅清奉檄分防通判觀音閣橫崗
之勝禦擊粵匪有功以同知直隸州升用補寧都未及期年調
署贛州府因粵匪洪秀泉道九江南康竄入腹地援兵登陣用
印襲衣誓以死守籌餉設策大小三百餘戰未嘗少挫守贛六

陝川縣志 卷九
年省城以外九郡相繼淪陷而贛城獨屹然無恙士民胥倚安
圍旣解復勸捐砲船及倉穀六萬石論功用知府賞戴花翎壬
戌去贛委署南安殘破之餘百廢俱舉積前後勞以道員留江
補用甫去任將引年遽以疾卒贛人祀入名宦刊有享帚詩集
問世子長達江西候補知縣

寧敬止歲貢生處世謙恭無少長每見輒揖學行見重於鄉閭

楊觀曜字麗軒豁達不羈由廩貢生教諭河津六載得保舉知四
川雙流縣修考棚以造土除悃匪以安民歷任六年先後拏獲
首犯數十名紀大功升任階州旋署眉州因捐議叙知府加道
銜兩次署永寧道正值軍務屢經戰陣勤勞不懈因公罣誤卒

於官子長庚現任四川縣丞

秦廷堅歲貢生篤志慕古性行嚴正不隨俗尙人稱古風

曹遐齡字宜亭歲貢生以文學起家督課甚嚴視功名爲性命教
仲子鴻舉卒進士孟季皆有聲庠序

王恩瀛號梅知伯儀次子父子選魁負時盛名工詩善賦天才放
逸爲黃學使所器重延主河朔書院爲人不修邊幅有狂士風
婁仲選一字萬青質樸寡言力行善事惜字紙印經文懸夜燈以
照人行施館穀以啓幼學生平慕小倉山之爲人自號景袁譽
重文衡楷法尤善卒以明經老著擬明史樂府二卷待梓

張永昭字小銘工詩文交多名士不以豪富自矜見義勇爲嘗爲

王又癡刊樹萱堂詩草

王臨池字墨溪恩貢生學有實行素履端方先世賈於豫父卒扶
櫬歸塋事祖母寡母均以孝聞家貧勵學不慕榮利自乙卯秋
闈報罷後遂絕意功名悉心訓誨一時文士多出其門其學自
經史外旁及諸家無不贍博晚年尤精岐黃術濟人甚衆及同
治丙寅已貢成均尋蒙 覃恩例改恩貢時年七十三歲與邑
中諸著英互相酬唱徜徉詩酒以終餘年著有墨花香村詩稿
待梓子二仲庶熙邑庠生先卒伯庶皦乙亥 恩科亞元
都九疇字瑞徵歲貢生事繼母以孝聞撫弱弟以友聞慕義好施
周恤族黨臨終囑子捐聖廟外地以廣宮牆事聞旌表建坊祀

忠義孝弟祠子賦三甲子解元

楊咸和字堯民敦本睦族型家有法選道光乙酉科陪貢居喪讀禮百日寢苦自閩南倦遊歸設藥以濟困窮延師以教戚族每遇公事卓然有爲如復社倉修文廟諸大役指不勝屈至治家尤有禮法迄今猶稱楊氏家規

曹鴻達字翊廷進士鴻舉兄少年與弟齊名高才博學睥睨一時科歲試輒高等秋風十五度屢薦不售丁酉鄉闈中式覆置遂絕意進取以恩貢終

武鳳彩字五峯教諭維藩四子性行嚴正博學能文屢躋秋闈以明經老楷法蒼堅碑版照世卓有父風

曹鴻舉字秋皋博學高才溫雅可親由選貢中式京兆主潞城平
順書院講席多所成就潞士區其堂曰經師人師丁未成進士
殿試二甲楷法端嚴咸以館閣期許未酬厥志即用河南大吏
僉欽其才學郭臬憲延爲子師聞望日盛以大用期之秋補授
溫縣未之任遽卒鄉會墨鎔經鑄史俱膾炙人口著有印雪山
房詩草待梓子振翰已卯恩貢生

韓懋德號厚菴天才敏捷少擅文譽道光甲午鄉試獲雋甲辰成
進士即用浙江歷任青田分水縣事是秋調簾文占首房得士
多名宿俞太史應方伯俱出其門派委運銅瀆南艱苦備歷差
回改禮部精膳司主事告假在籍主本邑講席教人學文以熟

復光正大家爲宗平生天真爛漫和而不同晚年精堪輿術卒於家

秦能復恩貢生孝友成性接人以和痛父積學無名請封追贈撫受弱弟盡以財產與之善處鄉里爲人排難解紛老而彌篤

曹鴻文字漢章性慷慨文風華弱冠後遊府庠食廩餼與伯兄鴻遠仲兄鴻舉頡頏一時有聲場屋邑侯劉子容獎予匾額擬以河東三鳳暇則與諸名士得詩酒之會高談雄辨四筵皆驚棘圍屢薦不售歲乙卯將貢成均時秋闈又報罷鬱鬱而卒士論惜之

楊長春號菊人工詩生平儉以律已勤以服官由廩貢拔例主事

戶部轉工部升虞衡司員郎三歷部曹均得政體以遜退稱於時告歸卒於家薛侍御有輓詩

韓子庚初名懋行進士懋德弟自幼慧悟經史過目成誦曾館高邑祁恭恪公家博覽古籍後遂兄遊宦南服自謂得江山之助
文格益進尤好研究韜略剛強自任壬子中式副車未竟其志而卒

李應又孝廉載子以父任平陽訓導歿於官負體還鄉事旌表孝子

秦秉範字水村沈默好學耿介性生家貧傭書度日及有聲庠序
豐於舌耕而自奉無異貧時惟事父甘旨需備極充裕選道光

己酉科拔貢就職直隸州州判時有友願助資勸仕出毅然以親老力辭鄉黨咸以孝稱邑有公事持正不阿十踏并門積學未逮嘗庭訓諸子曰人生讀書明理綱常倫紀無虧乃真學問非徒爲博取功名也其抱負之宏達可想見已得年五十卒著有硯荷廬詩文待梓

武心廣字寬人郡增生孝友性生執親之喪守制六載事兄無違同居和睦四十如一日授徒鄉里儉以養貧著春秋王侯諡號歌一卷四惜齋詩文二卷待梓

李苾號蓮溪性敏好學幼負才名戊午鄉舉辛未大挑一等用知縣分直隸北河候補以能幹著權篆雄縣未週月去任遽卒

都賦三字京堂彙甫其號也少負敏質未冠登庠序屢列優等同治甲子科以第一舉於鄉應禮闈薦未售隨以知縣註冊銓選由都歸里嘗語人曰與其覓官於朝不如退耕於野自號退耕野人遂無志仕進終老於家生平急公好義光緒戊寅歲大祲兼有豫匪患境賑防並舉出力爲優大富獎以學道愛人匾額邑學宮前照墻規模逼隘文氣不舒累年科名減色同治間慨然以己近照墻地三畝餘捐作廟塞籍資宏闊自是掇巍科名相繼不絕尤見稱於士林卒年古稀著有秋山書屋文稿睡餘隨筆詩草待梓

曹登瀛字仙洲學術純正謹言慎行事繼母以孝聞甲子舉於鄉

辛未成進士以知縣分發河南即用到省一載未任而卒

武培德字樹滋金武氏三狀元裔篤好經史過目不忘工屬文初
執筆時出言驚人幼肄業望洛書院即爰知於薛鶴亭侍御侍
御峻節高風於人少所許可獨於君稱忘年契後歷任 官師
無不刮目以視舌耕幾三十年列門下者皆一時俊彥七踏并
門中同治癸酉副車以直隸州州判注冊銓選雖屬舉不第而
文日益精尤邃左氏學著有十二公時勢論峯芙山館課藝待
梓洎水寶千山觀察贈以詩云他日立 朝能鎮靜薛夫子後
獨君期是其爲人又不僅長於文詞己也庚辰歲邑宰李明府
延修縣志草創胥出其手未及歲事因疾遽卒惜哉子孔泗

邑庠生

秦忻字一農幼聰穎及長多智謀家貧好學不倦同治癸酉科拔貢旋游京師考取八旗官學漢教習傳補正藍旗教習俸滿以知縣選用未任而卒著有守硯堂詩文稿待梓

韓懋昭字勉明歲貢生進士懋德之季弟有品有學克儉克勤爲文簡易構思最捷一題立成數藁試輒冠軍辛酉鄉闈以額滿見遺自是遂無志功名惟以教育人材爲樂一時遊其門者稱循循善誘云子之棹邑廩生

杜士俊黃庄村人性戇直家貧食力其父懷宏歿於河南廬氏縣誓取父骸苦不知所行近盧邑過一山谷遇虎倉猝莫遊虎竟

不傷而去山上人異而問之士俊告以故愁容可憫中有姓李者名秀蹊愕然曰我與爾同鄉昔爲爾父夥爾父死即我爲殯今遇虎不傷孝所感也士俊大喜叩謝遂得父骨所在其人且爲謀曰爾父與莫某爲莫逆交某昔試京兆無資爾父曾助以百金後得官報之不受今以翰林在籍蓋往投之彼念舊交必使爾父與櫬而返士俊曰吾來時一無所知今得君示殯所在已出望外何敢他求况父在不受彼報今我求之非父志也遂忍困負骸而歸欲合母葬而母厝於崖岸樞夥不辨無奈號泣三日一樞忽糝土崖磚裂審視之母碑在焉喜而合葬村人咸稱之爲杜孝子

李天成景聚次子家貧性孝同治間歲飢境尤迫雖有父兄貿易中州不暇內顧母又染疫疾晝夜呼泣天成仰屋長吁無所爲計因竊剖胸前肉烹調以進母病頓愈嗣因菽水無資一日向郊外野哭忽見空隙有物拾得古錢百餘銀少許持回奉養母

賴以全

以上舊志

李長清重興鎮人清光緒間歲貢生與陳黼堂同里黼堂爲一時傑出遇有疑難猶就正於公晚年絕意功名優游林泉吟咏自適

張文明清光緒間邑庠廩生治南村人少從申逢楊學工舉業一時名輩如孝廉黼堂宋選魁捷庵張廣文蘭溪皆出其門貌清

奇爲人有崖岸無敢以非理干之者

馬佩衡字健菴延年之孫受業竇千山之門工舉于業書院月課
恒冠同曹屢薦未售時論惜之

馮子雲字天衢張仰村人歲貢生世元之子光緒間歲貢倜儻長
辨在西南鄉一帶極負聲望排難解紛西鄉詞訟爲之鮮少自
先生歿後而獄訟繁矣

陳汝明字黼堂光緒己丑舉人歷任壺關崞縣教諭博學能文所
著詩文散佚不存殊爲可惜

楊長達字尊三號春潺豫成長子雙目炯炯資稟高朗工詩善琴
雅有深致清附貢生歷署江西長寧建昌龍南等縣勤政愛民

所至有聲著有眠琴山房詩集待梓長子舒另有傳仲子毅清
宣統二三年間曾充山西諮議局議員改革後任和順縣宣講
員工圍棋三子清庠生四子固皆穎悟早卒

都廣揚字舜卿解元賦三子孝友寬厚刻苦愛人長子桓另有傳
曹登萊登瀛叔弟工舉業尤善騰書各寺廟遺跡甚夥鄉試屢薦
且屢備中迄未得售人咸惜

楊長森字東坪豫成仲子清布政使司理問軀幹秀偉言語伉直
好苦思工山水喜琴詩文楷法均超逸所作多散失惟莘原遊
記待梓隨兄弟達官西江襄城政績歸鄉教子嚴厲曾整理文
廟祭器提學使錫嘏獎以禮在警宗四字感地方瘠苦不時親

履畎畝勸農桑又不辭勞苦爲地方造白土坂松林一處卒年七十子六長謙山西大學肄業察哈爾財政廳稽核處主任次勉清己酉拔貢國民代表會議議員次厚陸軍大學畢業晉綏綏靖公署參謀處處長次愉又次聰劬

申凌雲子逢楊清同治間邑庠生城東三十里黃虎掌人善大楷當時東鄉一帶匾額對聯多出其手教授鄉里成就頗多

田心安字靜齋冶頭鎮人少孤事孀母段氏至孝及長以開採煤礦爲業有窯數處清光緒二三年間鄉人欠債者爲數甚鉅大祲後取券焚之家人問故曰罹茲浩劫貧者餓斃富者疫死吾家六口獲全是再生也豈可以再生之人而復討前生之債乎

若留斯券恐有不屑子孫追討前債致生糾葛其餘疎財仗義之事尙多

田金鎖心安之伯父家殷富衣食類貧人有嘲其自奉太薄者解之曰吾農人不飢不寒足矣豈敢奢華凡鄰里有婚喪事及貧寒子弟無力就學者多出資助之晚年得子人以爲積善之報

都 桓字贊侯解元賦三之孫兄弟五人先生其長也敦厚謹慎鄉望極孚光緒己丑中十二名副榜甲午中式三十一名舉人候選知縣好善樂施排難解紛訥言敏行以誠感人歷任本縣高小校長學務總董商會會長省議會議員子之燿歷任武鄉陽城高平區長本縣公安局經理現任商會會長

審 模字子立增貢生精通醫理清介自守愛兒收族時人以耿直稱之

段樹棠字芾林清邑庠生山西優級師範選科畢業剛勁戇直作事嚴厲不稍假借光緒末其先君清政遇害君哀痛迫切與弟樹華多方偵刺卒將兇逆四人駢置於法民元任本邑高等小學校校長兼教育會會長以發展新文化爲務持最嚴格主義不辭瘠口講授學由均懷德畏威民元後本邑人材大率爲君造就首先薙髮提倡天足組織講演團爲政變以來開通陵川風氣第一人君弟樹華任山西陸軍第十五師師長早歲求學蹭蹬幾輟中賴君促成之所居東王庄段賈二姓不睦經君調

解無不悅服西南鄉民爭執待君一言立判財非有餘而急人之急年三十七以咯血卒子炳文山西教育學院畢業次炳武新民中學肄業

李克忠字蓋忱清邑廩生山西法政學校畢業充本邑自治事務所所長及勸學員勤勞盡職後充河東道尹公署科員民國十二年當選山西省議會第二屆議員提議廢除本邑油酒粉磨捐知事劉鳳銘辦事操切君彈劾撤退之十七年任山西陸軍第十五師軍法處處長君忠厚謹慎喜爲人解除糾紛鄉人無不愛敬焉

張文芳字蘭溪冶南村人清光緒間廩貢生援例得教職歷任洪

洞縣學訓導吉州學正晚年失明吟咏自適所著有老瞽吟待梓

張治孝字廉甫張蘭溪之猶子也學問敏贍書法圖潤喜吟咏所著有榆蔭軒詩稿惜享年不永以優廩生終

張士楷字鑑堂清宣統間恩貢生張文明先生之三子也素承庭訓得小試利器從之遊者多所成就惟晚年性喜經商人多近利少之然有口辯貿易之餘輒爲人排難解紛身歿之後人多思之

張治昌字世五邑廩生文芳之族姪也善屬文每試輒冠儕輩光緒間歲試所作小人間居爲不善一藝學憲寶熙批云當與宋

人經義並傳書法毆陽善本惟骨力稍遜

李文藻字翰苑安陽村人清光緒間邑廩膳生品端學優工書善畫

馮經字子明清拔貢陝西候補州判勤慎自好民國初年任本邑財政科科長因省委巧圖索賄忿然動厭世想投東川硯池而卒士民莫不扼腕

楊舒字安甫又號寬夫長達予子工書畫善社交授河南巡檢歷任靈氏之欒川鎮南召之李青店所至有聲

好善樂施

明徐璣伋子正統四年荒輸粟二千五百石賑飢旌表授七品官

趙翹天順三年荒輸米三百石備賑勅諭旌表

徐鉞成化年輸米六百石賑飢旌表授散官

徐鑛成化中輸銀四百兩賑濟勅授散官

武鶴成化五年輸粟五百石賑荒勅諭旌表

徐樸成化九年輸銀助賑勅授散官

王興成化中輸粟助賑旌表

武信成化中輸銀三百兩授義官

寧溫寧演宏治中輸粟一百石賑荒旌表

秦洪秉公仗義萬歷十四年荒輸粟二百石濟賑

秦應雲輸粟二百石 秦孟魁輸粟二百石

李國卿輸粟二百石

張守庫 楊憲

武應鰲

趙守安

楊爾茂

秦應化 焦守金

王希鴻

徐大經

王孟節

蘇廷甫 秦一貫

訓導

馮時達

侯守眞

馬尙升

李發榮 桑萬庫

郭大利

秦繼堯

馮學讓

庠生

以上各輸粟一百石濟荒

秦恒吉廩生自設粥廠活人甚多

李長茂輸米二十石 楊友仁輸米二十石

路孟宜輸米四石五斗助賑

王寬敦厚周謹隆慶二年捐資助軍餉劄授太醫院吏目

都志宏因學宮地隘捐地一畝有奇以廣其址

婁凌雲因遷學捐地一畝有奇樓屋一所

曹邦寧民信父雅有德量年荒出粟救飢由庠生授禮部儒官

李勤年高年劭尚義輸財萬歷元年給冠帶

楊文魁德重鄉評崇正二年出粟賑荒大部給以冠帶

徐允敬樂義修崇正二年煮粥活人有司勒石誦義

甯一相樂義好施崇正十三年大飢邑人餓死於道者相枕藉肉骨散棄原野一相募人日往瘞之凡千有餘具子二景俞琯皆名諸生

婁繼祿捐助學宮地畝

曹廷撥賑貧撫姪

路遠輕財好施

韓思順慷慨尙義

武深清排難解紛

都拱極秉禮鄉約

王一代重義敦倫

馮瑗友愛讓產焚券恤貧

徐岐好善樂施

清曹民悅邦寧子邑諸生孝友慈和如其父兄教子有方年飢與

兄民信共輸粟以賑鄉里事聞偕旌

曹延庚貢生民信子任紹興府通判承父志與弟延禧獨建明倫

堂凡費五百餘緡

都勲歲貢孝友耿介爲士林矜式居喪盡禮壬子遷廟學任創齋

廊尊經閣費五百金而不專名尤屬義舉

姚可頓教習文炳父康熙間兩舉鄉飲賓年八十餘拄杖井里慷慨樂施鄉閭憤爭者屢質成之有陳大邱王彥方之風調恤貧苦竟無虛日當孫令治縣時可頓獨捐倉谷五十石以備荒遇荒旱合村窮乏者給粟以濟之里人至今猶戶誦焉

王瑛敦倫重義終身不入城市耕鑿自給外即以散親鄰

武雍鄉飲耆賓老成典型經理修學獨多勞動邑人榜其門曰勞謙終吉

李孔懿急公慕義雍正間公舉耆賓且助修學宮凡邑之公事靡不盡力

和參化廩生兄弟讓產更能調卹宗黨

王黴性行慈和值荒歉與其兄彭設粥濟人貧者賴以存活

劉端制行剛方遇親黨輻輳事輒排難解紛且好義樂施康熙間

邑遭饑饉極力賑卹族里得生存者甚衆

劉堯裔廩貢生大節行義力追古人年荒析券周急惟力是視人

有善輒津津樂道歿後人猶稱之

郭守璧友愛兄弟周濟鄉鄰爲善惟日不足康熙六十年荒出粟

賑濟本村饑民多藉全活乾隆元年復以本村外路入長治行

者必由牛皮掌山坡陡峻人畜疲喘行旅苦之守璧於村北特

闢一逕寬平接高嶺鋪約十里於三道河建石橋其泥塗者覆

以石往來便之

徐最生平疎財重義撫幼姪本照讓以遺產親黨窮乏者有求必應多扶植族人貧不能婚娶者成全之

都燕性耿正鄉里爭訟每就燕解之貧困者不靳解推又捐銀六十四金修王兵備祠感其有全城之德事載祠碑

王中環素行端良尤踴躍慕義香磨河窄港口每遇水發湍激渡人時有沈溺之患中環獨力駕橋者十載乾隆四年乃倡議鑿山開廸以避河水爲久遠往來之計因身任其事不惜勞苦二年餘而成行旅至今賴之

馮君顯邑庠生康熙八年捐嶺西村松坡地一段於龍神祠以供修葺糧銀立單令四子分認後青松成林西溪村欲行攘去其

子滋出理前令平斷明以河爲界永歸廟祀

魏振璽公直存心寬厚待人樂善好施

王慎修貢生捐輸樓房四十七間爲書院巡撫阿賜額旌之有借貸不能償者率焚其券又嘗輸藥餌以救疾苦有司屢旌其門著有鳴情草

楊呈秀平生純厚康熙間大饑斗米錢五百餘呈秀出所蓄分濟族人及鄉里困餓者市行拾一包裹約百金即坐守不去或妄認詰數不符既聞沙塲村徐姓因酒醉失金即寄語使來認訊其詳得實悉以還之鄉里稱美邑令韓匾其門曰齒德兼優張爾相性耿直不詭隨事繼母如事所生教兩幼弟讀稍惰輒啼

泣垂訓弟感悟始憤發析產自取其薄者曰弟輩讀書無生計
吾竭力經營猶可成家值歲饑鄉佃多負租爾相悉免輸且各
恤其家爲人排難解紛里有疑皆取決焉

任子兆賦性溫良事親定省不懈父母病飲藥必先嘗之代弟償
債百金睦於鄉里嘗賙恤其困乏者

郭壯京貢生鄉飲大賓石井村人乾隆四十三年春早又值隣封
饑米商不至車集缺少壯京買三百餘石賑本村貧乏者

焦恒福職員慷慨樂施周恤族黨婚葬荒歉多所願助鄉里貧民

爭頌其義

以上
舊志

段引牛城東三十里艾蒼村人務農之餘以販糧爲業有義氣清

光緒二十六年因旱成災村人乏食鄰近儲糧之家以爲奇貨
可居又恐貧民無信縱出厚利亦不肯貸人公見哀鴻嗷嗷遂
以己業盡數抵押貸粟數十石民困賴蘇

以上續

寓賢

唐秦略郃陽人神龍中任淄川令升高華尉卒葬陵川

申環金成都人咸通中徙陵川縣北之蒲水村養性閒居無縻爵
志卒葬村西陽山下有人題其墓曰可惜荆山玉沉埋曠野間
五代楊筠松時號救貧先生爲武氏相阡地於赤石一山下至此
金元好問遺山太原人甫成童舉舉業其先人泰思所以引而致
之者謀諸親舊間皆曰瀟澤風土宗厚人質直而尙義在宋有

國時俊造輩出風俗既成益久益盛迄今帶經而鋤者四野相望雖閭巷細民亦能道古今曉文理爲子求師莫此州爲宜於是就陵川令之選命好問受學於郝天挺六年業成下太行趙禮部閒閒見其詩謂可繼杜甫京師稱元才子後過澤州有高平道中望陵川詩云書即零落頭今白腸斷荷衣出拜時尋請修金史方闕館會有沮之者不果乃構野史亭采摭遺事汗牛充棟輯金源君臣言行錄書未就而卒郝文忠經志其墓稱爲蘇軾黃庭堅後一人初以興定進士歷南陽內鄉令終左司員外入翰林知制誥金亡不仕

路元高平人爲省曹尙書郎五典郡事豪猾見畏人以路包拯呼

陝川縣志 卷九
之累遷河南按察轉運使後卒老邑之附城鎮子孫遂爲陵川人

李俊民號鶴鳴老人唐韓王元嘉後家於澤州得河南程氏之學金承安中舉進士第一應奉翰林文字未幾棄官不仕以所學教授鄉里來隱於邑之嵩山後徙懷州俄復隱西山元世祖以安車召至誕訪乞還山遣中官送之卒諡莊靖先生

元徐貴字仲平雲中人卜隱陵川

技術

宋都嚮舉進士博學通醫政和間官宜議即掌太醫院事遠邇求診應手輒逾能以其術焉

清王石麟邑東石掌村人武生性質直好讀書留心醫學能通解
終日兀坐手一卷不釋惜天不假年未竟其術

寂滋南坡村人出家崇安寺爲僧住持南坡佛刹少得異人授精
外科善針灸凡無名症一見輒辨療無不愈時人比之華陀惜
無傳其術者

方外

晉樂氏二女先陵川人始娠感神光而生繼母呂遇之酷冬月單
衣見脛責採茹號於野泣血漬土產苦苗赤葉斑如持奉母雪
逾甚移家壺關紫園山使拾麥穗遺穰無所得呼天號訴忽感
黃雲二女御之以升田野見之驚歎以爲仙去唐乾寧進士張

瑜所撰仙墨碑云羅之曲紅裳繡履歲儉求之即豐時早禱之
即雨迨宋崇寧間王師拒夏乏食傳二女顯靈飯軍封冲惠冲
淑真人廟號眞澤 按石城許穀碑記二女晉時人今西溪有
廟

金通眞子秦志陵川人棄應舉學道隱王屋少室間後遇披靈老
人於上黨授道籙遂立局平陽元都觀校補三洞書訖倏風雷
大作即立化著林泉集二十卷

元珍講王禮義鎮人張姓禮崇寺僧洞曉禪機後枕右股而化
清康熙間有胡僧者髮垂至肩足不着履見人好爲隱語流寓南
馬附城間十餘年後莫知所往

雍正間有編筐和尚居縣南郭家川戒行潔清日以編筐爲業嘗
自作詩曰世情與我淡我與世情疎太行山上月皎皎一輪孤
又能預知某日涅槃示衆爲禮讖至日梵唱喧闐和尚果合掌
冥坐倏然委蛻